



2022-4

27. oktober 2022

All. nr./notatnr.:

2021-149-0002-24

Sull./sagsbeh.: MS/jh

**Qeqqata Kommuniata meeqqap tapersorsorneqarnissaa
pillugu suliamik suliarinninnera akuerineqarsinnaasimangi-
laq**

Qeqqata Kommuniata (matuma kingornatigut kommunimik taaneqartartusap) meeraq qulingiluanik ukiulik pillugu nalunaarutiginninnerit arfineq pingasut piffissami 8. november 2017-imit 14. maj 2020-mut ingerlasumi tiguai.

Kommunip piffissami tassani meeqqap anaanaa arlalippassuariarluni ataatsimeeqatigisarsimavaa oqaloqatigisarsimallugulu, anaanaasullu meeqqani pillugu ikioqqulluni kommuni arlaleriarluni qinnuigisarsimallugu.

Anaanaasup kommuni tamatuma saniatigut panimminut tapersorsortitut ikior-titut atorfinitsinneqarumalluni allakkatigut 26. januar 2021-mi qinnuigisimavaa.

Kommunip suliami iliuuseqannginnera ilitsersuinnginneralu anaanaasup Ombudsmandimut 5. februar 2021-mi naammagittaalliuutigaa.

Suliamik misissuineq Ombudsmandip tamanna tunngavigalugu aallartippaa.

Anaanaasoq panimminut tapersorsortitut ikiortitut atorfinitsinneqassasoq kommuni 30. marts 2021-mi aalajangiivoq.

Ombudsmandi isumaqarpoq kommunip nalunaarutiginninnernik arfineq pingasunik taakkuninnga tigusaqarnermini nalunaarutiginninnerit isumaginninnikkut misissuineramik aallartitsinissamut pissutissaqalersitsinersut aalajangiinissani sumiginnarsimagaa. Ombudsmandip tamanna tunngavigalugu naliliinera unaavoq kommunip meeqqanik tapersersuisarneq pillugu inatsimmi § 19 eqqortissimannngikkaa/malissimannngikkaa. Tamanna Ombudsmandi isorisarialerujussuartut isigaa.

Ombudsmandi aammattaaq isumaqarpoq kommunip anaanaasumik ataatsimeeqateqartarnerpassuarmini oqaloqateqartarnerpassuarminilu anaanaasumik ilitsersuisussaataitanini eqqortissimannngikkaa. Ombudsmandip tamanna tunngavigalugu naliliinera unaavoq kommunip suliassat sularineqartarnerat pillugu inatsimmi § 7, imm. 1 eqqortissimannngikkaa/malissimannngikkaa. Tamanna Ombudsmandip isorisariaqarluinnartutut isigaa.

Kiisalu Ombudsmandi isumaqarpoq kommunip nalunaarutiginninnermik siulermik tigusaqarneranit anaanaasup tapersersortitut ikiortitut atorfinitsinnerqarumalluni qinnuteqaateqarnerata tungaanut suliamik sularinninnera naammaginannngilluinnartuusimasoq, anguniagaqannginnermit ilatsiinnarnermillu sunnigaasimasoq, kiisalu kommuni meeqqamut tapersersuiniutinik aallartitsisoqarnissaanik piffissami pissutissaqanngitsumik sivisuallaami aalajangiiniaasaarsimasoq. Ombudsmandip tamanna tunngavigalugu oqaatigaa meeqqanik tapersersuisarneq pillugu inatsimmi § 21, imm. 1-ip malinnissaa kommunip sumiginnarsimagaa. Tamanna Ombudsmandip akuerineqarsinnaanngitsutut isigaa.

Ombudsmandip ataatsimut isiginnilluni naliliinera unaavoq kommunip suliamik sularinninnera akuerineqarsinnaanngitsoq.

(Oqaaseqaat 27. oktober 2022-meersoq, j.nr. 2021-149-0002)

Tamatuma kingornatigut imaattunik oqaaseqaateqarpunga:

1. Suut misissorpakka?

1.1. Suliamik suliarinninninni kommunip meeraq pillugu nalunaarutiginninnernik 8. november 2017-imit 14. maj 2020-p tungaanut tigusaqartarnermini iliuuseqartussaaitaanera isummerfigaara.

Kommunip tapersersortitut ikiortitut atorfinitsitsinissamut periarfissamik anaanaasumut ilitsersuisimanera aammattaaq isummerfigaara, matumani pineqartup nammineq tapersersortitut ikiortitut atorfinitsinneqarumalluni qinnuteqaateqar-nissamut periarfissaqarnera ilanngullugu eqqarsaatigalugu.

Kiisalu kommunip nalunaarutiginninnermik 8. november 2017-imi tigusaqarnermini meeqqap tapersersorneqarnissamik pisariaqartitsisinnaaneranik siullermeertumik paasisaqarnerminut anaanaasup nammineq tapersersortitut ikiortitut atorfinitsinneqarumalluni 26. januar 2021-mi qinnuteqaateqarnerata tungaanut tapersersuiner-mi iliuutsinik aallartitsisimanninnera isummerfigaara.

Anaanaasup tapersersortitut ikiortitut atorfinitsinneqarumalluni qinnuteqaataata 26. januar 2021-mi tiguneqarneranit anaanaasoq atorfinitsinneqassasoq 30. marts 2021-mi aalajangiisoqarnerata tungaanut piffissaq kommunip suliamik suliarinninnerminut atugaa isummerfiginngilara.

Meeqqamik oqaloqateqarsimanninneq, isumaginninnikkut misissuiner-mik aallartitsisimanninneq anaanaasullu tapersersortitut ikiortitut atorfinitsinneqarneranut atatillugu iliuusissanut pilersaarutip suliarineqarsimanninnera aammattaaq isummerfiginngilakka.

Kiisalu anaanaasup suliami allagaatinik paasitinneqarumalluni qinnutigisaa, kommunip aningaasaqarnermut tunngasut pillugit apeqqummut akissuteqarsimanninnera kommunillu allattuisussaaitaanera nalunaarsuineralu isummerfiginngilakka.

Tamatumani Ombudsmandi pillugu inatsimmi § 14, imm. 1 innersuussutigaa, tassuunalu aalajangersarneqarpoq naammagittaalliuut misissuineramik aallartitsinermut pissutigissallugu naammannersoq Ombudsmandip aalajangissagaa.

Oqaatigaara pissutsit meeqqap atuarneranut tunngasut immikkoortikkikka, tassami kommuni ernummateqarlunga 9. maj 2022-mi allaffigigakku, meeqqallu atuartussaataasutut ukiullip ukiuni tallimangulersuni atuartinneqarsimannginera ernummatigigiga allakkani taakkunani oqaatigalugu.

1.2. Ajornartorsiutinik taamaattunik siusinnerusukkut nammineq suliarinnissimanngikkaangama Danmarkimi atuakkiaasimasut aamma Folketingip Ombudsmandiata periaasia oqaaseqaatinni arlalitsigut aallaavigisarpakka. Kalaallit Nunaanni inatsiseqartitsinikkut tunngaviup Danmarkimilu inatsiseqartitsinikkut tunngaviup pingaarnerusutigut assigiinnerat tamatumunnga pissutaavoq. Kalaallit Nunaanni inatsiseqartitsinikkut tunngavik Danmarkimi inatsiseqartitsinikkut tunngavimmit allaasoq isumaqaraangama tamanna oqaatigisarpara.

Oqaaseqaatiga imatut tulleriinnilerneqarpoq:

- Immikkoortoq 2: Suliaq pillugu naatsumik oqaatigisassat
- Immikkoortoq 3: Inatsiseqartitsinikkut tunngavigisaq
- Immikkoortoq 4: Kommunip isumaa
- Immikkoortoq 5: Uanga paasinninnera naliliineralu
- Immikkoortoq 6: Eqikkaalluni inerniliineq
- Immikkoortoq 7: Kommunip malitseqartitsiviginninnera

Immikkoortoq 5 pingasunik immikkoortuaraqarpoq, taakkunanilu qulequttat ataasiakkaarlugit immikkut allaaserineqarlutik. Immikkoortuaqqat pingasut taakku suli marlunnik immikkoortoqarput, taakkunanilu naammagittaalliuut, suliامي allagaatit kommunillu oqaaseqaatai aallaavigalugit suliap ingerlasimaneranik uanga paasinninnera aallarniutitut allaaseraara, naggataatigullu ataatsimut naliliil-lunga.

Oqaatigaara suliap ingerlasimanerata allaaserineqarnera oqaaseqaammut tulliummat.

2. Suliaq pillugu naatsumik oqaatigisassat

Meeqqap ukiumi atuarfiusumi 2017-2018-imi atuanngitsoortarnera meeqqap atuarfiata pisortaata kommunimut e-mailikkut 8. november 2019-imeersukkut nalunaarutigaa. Nalunaarutiginninneq 3. november 2017-imi ullulerneqarsimavoq. Meeraq taamani qulingiluanik ukioqarpoq.

Kommunimi suliamik suliarinnittoq atuarfiup pisortaanut 2017-ip naajartornerani ullua taaneqanngitsumi saaffiginnippoq. Saaffiginnissummi ilaatigut oqaatigineqarpoq ilaqutariit isumasioqatigineqarnissaat tulluartutut isigineqartoq. Ilaqutariit sukkulluunniit isumasioqatigineqarsimanersut suliami allagaatini takuneqarsinnaanngilaq.

Meeqqap ilinniartitsisuisa ilaata meeqqap atuanngitsoortarnera kommunimut 2. februar 2018-imi nalunaarutigaa, meeqqallu eqqarsartaatsikkut peqqissusia ernummatigigini oqaatigalugu.

Meeqqap atuanngitsoortarnera atuarfiup kommunimut 4. september 2018-imi ilisimatitsisutigeqqippaa. Anaanaasup ikiorneqarnissamik pisariaqartitsinera atuarfiup kommunimut aammattaaq ilisimatitsissutigaa, oqaatigamiummi ilaqutariit kommunip pilertortumik ikiorsiivigisinnaassagai neriuutigigini.

Anaanaasup paasissutissanik isertuussassanik ingerlatitseqqilluni tunniussisoqarnissaanut angajoqqaatut akuersinerminut uppersaat 12. september 2018-imi atsiorpaa.

Meeqqap atuanngitsoortarnera atuarfiup pisortaata kommunimut 24. september 2018-imi nalunaarutigeqqippaa. Nalunaarutiginninnermi immersukkami oqaatigineqarpoq meeqqap atuarnermik nuannarinnilersinniarnnerani ikiorneqarumalluni nalunaarutiginnittoqartoq.

Suliami allagaatinit erserpoq kommunip anaanaasoq nalunaarutiginninneq 24. september 2018-imeersoq tunngavigalugu Ilaqutariinnut Immikkoortortaqarfinni suliamik suliarinnittumit oqaloqatigineqarnissaanut 27. september 2018-imi aggeqqusimagaa. Ataatsimiinneq 5. oktober 2018-imi ingerlanneqartussaa-simavoq.

Ataatsimiinneq 5. august 2018-imi ilumut ingerlanneqarsimanersoq suliami allagaatini erseqqissumik takuneqarsinnaanngilaq. Suliamili allagaatini ilaavoq allakkiaq 8. oktober 2018-imeersoq assammik allataq, kommunimit suliarineqarsimasoq. Allakkiaq taanna paasisinnaasimangilara.

Allaffiup iluani e-mailimit erserpoq suliamik suliarinnittoq MISI-mut 8. oktober 2018-imi saaffiginnissimasoq, paasissutissanik pissarsiniarluni meerarlu pillugu suleqatigiinneq aallartinniarlugu.

Suliami allattuiffimmi allatamit 7. december 2018-imeersumit erserpoq anaanaasoq ulloq taanna ataatsimiinnissamik isumaqatigiissutaasumut takkussimangitsoq.

Suliami allattuiffimmi allatamit 13. december 2018-imeersumit erserpoq anaanaasoq ulloq taanna ataatsimiinnissamut takkussimangitsoq, napparsimalluni takkusinnaanani nalunaarutiginiarlugu puigorsimagamiuk.

Allaffiup iluani atugassatut allakkiamit MISI-mi tarnip pissusiinik ilisimasalimmit suliarineqarsimasumit erserpoq taassuma suliamik suliarinnittoq 14. juni 2019-imi attaveqarfigisimagaa, atuarfiup suliamillu suliarinnittup ataatsimiinnissaat pillugu. Suliamik suliarinnittup tarnip pissusiinik ilisimasalik 18. juni 2019-imi attaveqarfigisimavaa, paasissutissiissutigalugulu atuarfimmik ataatsimeeqateqarnissaq taamaatinneqarsimasoq, ullorli tullianik ataatsimiiffiususaaq aalajangerneqarumaartoq. Tarnip pissusiinik ilisimasalik 2. september 2019-imi allappoq suliamik suliarinnittumit tullianik ataatsimiittoqarnissaa pillugu attaveqarfigineqarsimangisaannarluni.

Anaanaasup allagai 25. juni 2019-imeersut tiguneqarsimasut kommuni 14. august 2019-imi allappoq. Suliap 2017-imi august/septemberimit 2018-imi oktober/novemberip tungaanut ingerlasimaneranik paasinninnini anaanaasup allakani taakkunani nassuiarpaa, ilaatigullu oqaatigalugu ikiortissaasualluni. Anaanaasup allakkanut qulequtsiussami oqaatigaa allakkat kommunip qinnuiginnin-nera malillugu allassimallugit.

Tarnip pissusiinik ilisimasalik meeqqap ineriartorneranik kommunimut 13. september 2019-imi nalunaarutiginnippoq. Tarnip pissusiinik ilisimasallip ilaatigut oqaatigaa meeraq eqqarsartaatsikkut/tarnikkut pissutsimigut ima kinguariarsimatigisoq (tarnikkut/eqqarsartaatsikkut ineriatornermi killiffimmut appasinnerusumut utersaarsimasoq), allaat MISI-p ammasumik siunnersuinissamik ilitsersuinissamillu neqeroorutaani peqataatinneqarsinnaajunnaarsimalluni, kiisalu taamaannera pitsanngoriartinneqassappat sukumiisumik katsorsaasoqarnissaa piusasaqaataasoq. Tarnip pissusiinik ilisimasallip aammattaaq oqaatigaa kommuni nalunaarfigigini, meeqqap siunnersuisulerneqarsinnaanera/tapersersortitut ikior-tilerneqarsinnaanera neriuutigalugu.

Kommunip anaanaasoq nalunaarutiginninneq 13. september 2019-imeersoq tungavigalugu 7. oktober 2019-imi oqaloqatigineqarnissaanut 25. september 2019-imi aggeqquaa.

Suliami allattuiffimmi 7. oktober 2019-imi ataatsimiinneq pillugu allatamit 24. oktober 2019-imi suliarineqarsimasumit erserpoq tarnip pissusiinik ilisimasallip nalunaarutiginninnermik nassiussaqaarsimanera anaanaasup nalunngikkaa, taamaattumillu massakkut ikiorneqarnissani neriuutigisimagaa. Suliami allattuiffimmi allatamit erserpoq suliamik suliarinnittup paasinninnera unaasoq anaanaasup panini eqqarsaatigalugu ikiorneqarnissani pisariaqartikkaa.

Kommunip paasissutissanik ingerlatsivinnit allanit pissarsiniarsinnaanera akueralugu uppernarsaatit marluk immikkoortut oqaasertamikkut assigiissut anaanaasup 7. oktober 2019-imi aamma 23. oktober 2019-imi atsiorpai.

Suliami allagaatinit erserpoq kommunip Ilaqutariinnik Sullissivik, MISI, atuarfimmi siunnersorti tarnillu pissusiinik ilisimasalik 23. oktober 2019-imi qinnuigisimagai meeraq anaanaasorlu pillugit paasissutisseeqqullugit.

Meeqqap imminut toqunnissamik eqqarsateqartarnera imminullu kilersitertarnera nunap immikkoortuani nakorsap kommunimut 26. november 2019-imi nalunaarutigaa.

Meeqqap ataataa kommunimut 28. november 2019-imi saaffiginnippoq, meeqqap taamaannera kommunillu ikiuinissamut periarfissaa pillugit. Suliami allagaatinit erserpoq kommuni, anaanaasoq ataataasorlu ulloq taanna ataatsimiissimasut.

Meeqqanut inuusuttunullu tarnikkut napparsimasunut nakorsiartarfimmi meeqqat tarnikkut pissusiinik ilisimasalik kommunimut 10. januar 2020-mi nalunaarutiginnippoq, meeraq pillugu. Nalunaarutiginninnermi ilaatigut oqaatigineqarpoq meeraq taama atugarliortigimmat piffissap naammaginartumik sivilissusillip iluani iliuuseqartoqartariaqartoq.

Suliami allattuiffimmi allatamit 7. februar 2020-mi suliarineqarsimasumit erserpoq kommunip anaanaasoq 10. januar 2020-mi ataatsimeeqatigineqarnissanut aggeqquneqarsimasoq. Ataatsimiinnissaq taanna suliamik suliarinnittup taamaa-tippaa, kingusinnerusukkullu ataatsimiittoqarsimanani.

Suliami allagaatinit erserpoq kommuni suliami susassaqartunik 13. januar 2020-mi ataatsimiitsitsisimasoq.

Suliami allagaatinit erserpoq kommunip anaanaasoq taassuma angerlarsimafiani 17. januar 2020-mi ataatsimeeqatigisimagaa.

Suliami allagaatinit erserpoq anaanaasup 7. februar 2020-mi ataatsimeeqatigineqarnissaa kommunip pilersaarutigigaa. Ataatsimiinneq taanna ingerlanneqarsimanngilaq, anaanaasormi napparsimanini pissutigalugu peqataasinnaanani nalunaarsimammat.

Meeqqat tarningisa pissusiinik ilisimasalik kommunimut meeraq pillugu 11. februar 2020-mi nalunaarutiginneqqippoq. Nalunaarutiginninnermi tassani ilaatigut oqaatigineqarpoq pissutsit attanneqarsinnaanngitsut.

Suliami allagaatinit erserpoq kommunip anaanaasoq 11. februar 2020-mi nalunaarutiginninneq tunngavigalugu ulloq taanna attaveqarfigisimagaa, angerlarsimaffimmut pulaarsinnaaneq oqaloqatigiissutiginiarlugu. Suliami allagaatinit aamma erserpoq kommunip anaanaasoq 18. februar 2020-mi attaveqarfigeqqissimagaa, angerlarsimaffimmut pulaartoqarsinnaanersoq paasiniallugu. Piffissap taamaalinerani angerlarsimaffimmut pulaartoqarsimanersoq suliami allagaatini takuneqarsinnaanngilaq.

Anaanaasoq kommunimut allakkatigut 14. april 2020-mi saaffiginnippoq, nutaamik suliamik suliarinnittuliisimaneq suliamilu imminut tunngasumi killiffik pillugit. Anaanaasup tamatumunnga atatillugu oqaatigaa isumaqarluni suliaq kommunimi arlaannaannilluunniit suliarineqanngitsoq.

Saaffiginnissumminut 14. april 2020-meersumut kommuni akissuteqaqqullugu anaanaasup 20. april 2020-mi nukingisaarpaa.

Suliami allagaatinit erserpoq anaanaasoq kommunip 24. april 2020-mi ataatsimeeqatigisimagaa. Suliami allattuiffimmi ataatsimiinneq taanna pillugu allatamit erserpoq meeqqap ikiorneqarnissaa anaanaasup ilungersuutigigaa. Tapersorsortitut ikiortimik atorfinitsitsisoqarsinnaanera suliami allattuiffimmi allatami eqqaaneqarpoq.

Meeqqap kigutininik misissuineranut piffissami sivilisunerusumi takkuttarsimannginnera kigutigissaaviup kommunimut 14. maj 2020-mi nalunaarutigaa.

Suliami allagaatinit erserpoq kommunip nalunaarutiginninnermik suliarinnittartuisa anaanaasoq 2. juli 2020-mi ataatsimeeqatigisimagaat. Ataatsimiinnermi tassani oqaatigineqarpoq kommunip meeraq tapersorsortitut ikiortimik neqeroorfigi-

sinnaagaa, oqaatigineqarlunili tapersersortitut ikiortiliineq immini naammanngitsoq, inullu ilinniagaqarsimasoq pisariaqartinneqartoq.

Suliami allagaatinit erserpoq kommunip paasissutissanik ingerlatsivinnit allanit pissarsiniarsinnaanera akueralugu uppersarsaat anaanaasup 2. juli 2020-mi ataatsimiinnermut atatillugu atsiorsimagaa.

Suliami allattuiffimmi allatamit 3. juli 2020-meersumit, kommunip nalunaarutiginninnermik suliarinnittartuisa aamma anaanaasup ulloq taanna ataatsimiinnerat tunngavigalugu suliarineqarsimasumit erserpoq anaanaasup panini ikiorsinnaassaguniuk sakkussat amigaatigigai.

Suliami allagaatinit erserpoq MISI angerlarsimaffimmut 16. september 2020-mi aamma 15. oktober 2020-mi pulaarsimasoq.

Ataatsimiinneq 11. august 2020-mi ingerlanneqartoq pillugu suliami allattuiffimmi allatamit 28. oktober 2020-meersumit erserpoq nakorsap meeraq pillugu oqaaseqaataa kommunip tigusedimagaa, tassanngalu erserpoq meeqqap nappaatua suussusilerneqarsimanngitsoq. Tamanna tunngavigalugu oqaatigineqarpoq suliaq Meeqqanut Inuusuttunullu Immikkoortortaqarfimmut nassiunneqarsimasoq.

Suliami allagaatinit erserpoq anaanaasooq kommunip 9. november 2020-mi oqaloqatigisimagaa.

Suliami allagaatinit erserpoq suliami susassaqtut kommunimi meeraq pillugu 23. november 2020-mi ataatsimiissimasut. Suliami susassaqtut ataatsimiinnerat pillugu suliami allattuiffimmit 26. november 2020-mi suliarineqarsimasumit erserpoq anaanaasup panimminut tapersersortitut ikiortitut atorfinitsinneqarumalluni qinnuteqaatini nassiunniaraa.

Allaffiup iluani e-mailikkut allaffigeqatigiittarnermi allagaasimasumit erserpoq anaanaasup tapersersortitut ikiortitut atorfinitsinneqarumalluni qinnuteqaatini nassiussinnaagaa, kommunilli tamanna anaanaasumut paasissutissiissutigisi-

manngikkaa. E-mailimit 16. december 2020-meersumit kiisalu suliami allattuifimmi allatamit 4. januar 2021-meersumit erserpoq tapersersortitut ikiortitut atorfinitsinneqarumalluni qinnuteqaat anaanaasumit Atugarissaarnermut Immikkoortorta qarfik suleqatigalugu suliarineqassasoq.

Tapersersortitut ikiortitut atorfinitsinneqarumalluni qinnuteqaat anaanaasup 26. januar 2021-mi nassiuppa.

Suliami allagaatini ilaavoq ilaqutariinnik sullissivimmut innersuussinermi immersugassaq immersorneqarsimasoq. Immersugassaq taanna anaanaasumit 22. marts 2021-mi atsiorneqarsimavoq, suliamilli suliarinnittumit atsiorneqarsimani.

Anaanaasooq panimminut tapersersortitut ikiortitut atorfinitsinneqassasoq komuni 30. marts 2021-mi aalajangiivoq.

Meeqqap atugarissaarnera pillugu ernummateqarnermik nalunaarutiginninnerit katillugit arfineq pingasut kommunip 2017-imi novemberimit 2020-mi majimut tigusimavai.

3. Inatsiseqartitsinikkut tunngavigisaq

Pissutsit tulliini eqqartorneqartut meeqqat tapersersorneqarnissaannut Inatsisartut inatsisaatigut nr. 20-kkut, 26. juni 2017-imeersukkut (matuma kingornatigut meeqqanik tapersersuisarneq pillugu inatsimmik taaneqartartussakkut) aamma pisortat ingerlatsineranni suliassat suliarineqartarnerat pillugu Inatsisartut inatsisaatigut nr. 8-kkut, 13. juni 1994-imeersukkut kingusinnerusukkut allannguu-teqartinneqartarsimasukkut (matuma kingornatigut suliassat suliarineqartarnerat pillugu inatsimmik taaneqartartussakkut) aalajangersaavigineqarput.

3.1. Kommunip nalunaarutiginninnermik tigusaqarnermini iliuuseqartussaaitaanera

Makku meeqqanik tapersersuisarneq pillugu inatsimmi § 19-ikkut aalajangersarneqarput:

“§ 19. Kommunalbestyrelsi nalunaarummik tigusaqaruni, tak. §§ 15, 16 imaluunniit 17, **akunnerit 24-t** iluanni isumaginninnikkut misissuititsinissamik tunngavissaqar-nersoq aalajangiiffigissavaa tak. § 45.

Imm. 2. Imm. 1 naapertorlugu kommunalbestyrelse isumaginninnermi sullissinikkut misissuineramik aallartitsinissamik aalajangiippat, tamanna piaarnerpaamik aammalu nalunaarutip tiguneqarneraniit kingusinnerpaamik sapaatit akunneri marluk qaangiut-sinnagit misissuineq aallartinneqassaaq.

Imm. 3. [...]” [uanga erseqqissagara]

Allannguutissatut siunnersuut pillugu oqaaseqaatinit makku erserput:

“Nr. 2-mut

Allannguutip kommunalbestyrelsit piumaffigivai nalunaarutigineqartut tunngavigalugit isumaginninnikkut misissuisoqarnissaanik aallartitsisoqassanersoq akunnerit 24-t i-luanni aalajangeeqqullugit, tak. 45. [...]”

Taamaalilluni aalajangersarneqarpoq kommuni nalunaarutiginninnermik tigusa-qarpat nalunaarutiginninneq tiguneqarnerminit nal. ak. 24-t iluanni naliliiffigine-qartassasoq, isumaginninnikkut misissuineramik aallartitsinermut tunngavissa-qarnerasoq kommunalbestyrelsip aalajangiinissaa siunertaralugu.

Naliliinnermi tassani ajornartorsiutip misissorneqarnera suussusilerneqarneralu ilaasinnaapput, taamaaliornikkut pingaarnertut ajornartorsiut ernummatigine-qartorluunniit qulaajarlugu. Nalunaarutiginninneq nukingiullugu iliuuseqarnissa-mut pissutissaqalersitsinngippat suliaq pillugu paasissutissanik amerlanerusunik pissarsiniarnissaq pisariaqarajuttarsinnaavoq. Tassani ilaqtariinnik isumasioqa-tiginninnermik, suliami susassaqtut ataatsimiinnerannik suliniutinillu allanik aallartitsineq pisariaqarsinnaavoq.

Nalunaarutiginninneq isumaginninnikkut misissuineramik aallartitsinermut tun-gaviusinnaanersoq naliliiniarluni suliniut sunaluunniit aallartinneqaralarpat isu-maginninnermik misissuinerup aallartinneqarnissaanut tunngavissaqarnerasoq kommunalbestyrelsip nal. ak. 24-t iluanni aalajangertussaavaa.

3.2. Kommuniptapersortitut ikiortimik atorfinitsitsisoqarnissaa pillugu ilitsersuinera

Makku suliassat suliarineqartarnerat pillugu inatsimmi § 7, imm. 1-ikkut aalajangersarneqarput:

“§ 7. Ingerlatsinermut oqartussaaffiup inuit oqartussaaffigisamini suliassat pillugit apeqquteqarlutik saaffiginnittut pisariaqarneratut annertutigisumik ilitsersorlugillu ikiortassavai.

Imm. 2. [...]”

Oqartussaasut ilitsersuisarneranni siunertaasoq tassaavoq innuttaasut paasisstissanik pisariaqartitaannik tunioraaneq innutaasullu kukkusooqarnera, ilisimasaqanngissuseq paatsuinerilluunniit pissutigalugit inatsiseqartitsinikkut pisinnaati-taaffimminnik annaasaqarsinnaanerannik pinaveersaartitsineq.

Suliassat suliarineqartarnerat pillugu inatsimmi § 7, imm. 1-ikkut aalajangersarneqartumi pineqartoq tassaavoq suliani aalajangiiffigineqartuni aalajangiiffigineqartussaniluunniit ilitsersuinissamik inatsisikkut pisussaaffiliineq, tak. suliassat suliarineqartarnerat pillugu inatsimmi § 2, imm. 1. Taamaalilluni suliassat suliarineqartarnerat pillugu inatsimmi malittarisassat ingerlatsinermik suliaqarnivimmut atatillugu oqartussaasup innuttaasunik ilitsersuisarnissaanik pisussaaffiliisuunngillat. Ingerlatsinermilli suliaqarnivimmut atatillugu ilitsersuisarneq inatsiseqartitsinikkut tunngaviit nalinginnaasut ingerlatsinermilu ileqqorissaarnerup nassataraat.

Aalajangersakkap oqaasertaasa takutippaat oqartussaasoq innuttaasunut nammineq suliniuteqarnermigut ilitsersuinissaminut pisussaaffeqanngitsoq, suliassalli suliarineqartarnerat pillugu inatsimmi § 7, imm. 1 tunngavigalugu ilitsersuisusaatitaaneq taamaallaat atuuttartoq innuttaasut oqartussaasumut saaffiginnikkaangata.

Ilimagineqarporli oqartussaasoq innuttaasunik attaveqarfigisaminik ilitsersuinissaminut pisussaaffeqartoq, innuttaasoq ilitsersoqqulluni toqqartumik toqqanngitsumilluunniit qinnuiginnissimangikkaluarpalluunniit, innuttaasumilli ilitsersuineq

pissusissamisoortutut naleqquttutullu ippat. Tamanna pisuni oqartussaasup akisutaata iliusaataluunniit ilitersuisoqanngippat paatsoortitsiffigisinnaaffiini ilaaitigut atuuppoq. Tamanna immikkut atuuppoq oqartussaasoq pissutsit innuttaasup ilisimasaqarfigigunangisai pillugit ilitersuinngippat innuttaasup pissutissaqanngitsumik nikeriaqqissinnaajunnaarfigisinnaasaani pisinnaatitaaffimminiluunniit annasaqarfigisinnaasaani.

Oqartussaasoq innuttaasup pissutsit ilitersorneqarumalluni erseqqilluinnartumik qinnutigisaanit allaasut pillugit pisut qanoq issusiat apeqqutaatillugu taamatutaaq ilitersuisariaqarpoq. Taamaattumik innuttaasup pisut inatsiseqartitsinermut pissusiviusunulluunniit tunngasut suliassaqarfimmi tassani malittarisassat tunngavigalugit oqartussaasup oqaaseqaateqarnissaanut pissutissaqalersitsisut erseqqissarsimappagit oqartussaasoq nalinginnaasumik ilitersuisariaqarpoq. Tamanna atuussinnaavoq malittarisassat suliamut attuumassuteqartut innuttaasup paatsoorsimagai ilisimangikkaaluunniit naatsorsuutigisariaqarpat.

Innuttaasup ilitersortinniarluni oqartussaasumut qanoq iliorluni attaviginnittarissaa pillugu tunaartarisassanik aalajangersaasoqarsimanngilaq. Taamaattumik oqartussaasut innuttaasunik oqartussaasumut allakkatigut oqaasiinnartigullu saaffiginnittunik ilitersuisarnissaminnut pisussaaffeqarput.

Makku suliassat suliarineqartarnerat pillugu inatsimmi § 7, imm. 1 pillugu oqaaseqaatinit erserput:

”§ 7-imi aalajangersakkami erseqqissumik taaneqarpoq innuttaasunik ilitersuisarnis-saq ingerlatsinermi oqartussaasunut tamanut nalinginnaasumik pisussaaffiusoq. Aalajangersagaq malillugu pisariaqartitsineq naapertorlugu ilitersuisoqartussaavoq apeq-qutaatillugit suliassap suunera pissusiusullu erseqqissut. Allakkatigut ilitersuisoqar-sinnaavoq, soorlu ilitersuummik naqitamik tamanut atortumik, oqartussaasumut saaffiginnittunut tamanut tunniunneqartussamik imaluunniit ataasiakkaanut oqaasiin-nartigut imaluunniit taakku tamaasa atorlugit. Iltersuinerup qularnaallisariaqarpaa innuttaasut paasitilluarneqarnissaat malittarisassanik ingerlatsivimmi pineqartumi atorneqartunik aamma periaatsit oqartussaasumut saaffiginnittup malitassaasa suu-nerinik kiisalu innuttaasut paasissutissiissutigisassaasa suunerinik.

Oqartussaasutaaq innuttaasoq imminut saaffiginnittoq pisariaqarneratut annertutigisumik ikiortariaqarpaa pisariaqarpat qinnuteqaatinik, nalunaarutinik assigisaannilluunniit immersuinissaanut.

[..]”

Malittarisassat qanoq paasineqarnissaat aamma innuttaasut inatsimmi piumasaqaataasunik qanoq iliorlutik oqinnerpaamik pitsaanerpaamillu eqqortitsisinnanerannik innuttaasut naammattumik paasitinneqarnissaat oqartussaasup ilitser-suinerata qulakkiissavaa.

Oqartussaasup ilitseruinerana inatsisilerinikkut eqqortuussaaq sukumiisuussallunilu. Oqartussaasoq kukkusumik ilitseruiguni ilitseruinerami kukkunini pilertornerpaamik namminerlu suliniuteqarnermigut (ex officio) aaqqittariaqarpaa.

Sulianik suliarinnittut tamarmik ajornartorsiutit tamaasa pillugit ilitseruisinnaasasut piumasaqaataannigilaq, sulianilli suliarinnittup periarfissat allat innuttaasup innersuunneqarfigisinnaasai eqqumaffigissavai.

Uanga paasinninnera unaavoq suliassaqarfik taanna Kalaallit Nunaanni Danmarkimilu pingaarnerusutigut assigiittut. Taamaattumik Folketingip Ombudsmandiata ukiumoortumik nalunaarutaani (matuma kingornatigut (FOB-imik taaneqartartussami) 2011 1-3, Hans Gammeltoft-Hansenip allallu atuakkiaanni “Forvaltningsret”-imi aappasaanik (2002-mi) naqitertinneqartumi kapitali 10 aamma Niels Fengerip atuakkiaanni “Forvaltningsret”-imi siullermik (2018-imi) naqitertinneqartumi kapitali 10 innersuussutigaaakka.

3.3. Kommunip tapersersuinerami iliuuseqartoqarnissaanik aalajangiisus-saatitaanera

Kommunalbestyrelsip tapersersuinerami iliuuseqartoqarnissaanik aalajangiisus-saatitaanera meeqqanik tapersersuisarneq pillugu inatsimmi § 21-kkut aalajangersarneqarpoq. Meeqqanik tapersersuisarneq pillugu inatsimmi § 21, imm. 1-ikkut manna aalajangersarneqarpoq:

“§ 21. Kommunalbestyrelsip ikiorsiinissamik suliniuteqarnissaq aalajangissavaa meeqqap immikkut pisariaqartitsineranut annertuumik tamanna pingaaruteqartutut isigineqarpat.”

Meeqqanik tapersersuisarneq pillugu inatsimmi § 21, imm. 1 pillugu oqaaseqaatinit erserpoq tamanna meeqqap immikkut pisariaqartitsineranut annertuumik pingaaruteqartutut isigineqarpat ikiorsiinikkut suliniuteqartoqassasoq kommunalbestyrelsi aalajangiissasoq.

4. Kommunip isumaa

4.1. Kommunip nalunaarutiginninnermik tigusaqarnermini iliuseqartussaataanera

Kommunip uannut oqaaseqaammimi 30. november 2021-meersumi ilaatigut makku oqaatigai:

“[...]”

2 a) Nalunaarutiginninnerit ernummateqarlunilu allakkat eqqarsaatigalugit suliami inummut tunngasumi takuneqarsinnaavoq nalunaarutiginninneq 3. novemberimi tigu-neqarsimasoq, allattuiffimili takuneqarsinnaalluni nalunaarutiginninnerup tigu-neqarnera qanorluunniit iliortoqarsimanera allanneqarsimanngitsut.

2 b) Anaanaasoq taassuma kissaatigisaatut ilaqutariit katsorsarneqarnissaat siunertaralugu ilaqutariinnik sullissivimmut innersuussineq pillugu oqaloqatigineqarnissaminut 24. sept. 2019-imi aggeqqullugu qinnuigineqarsimavoq, takkussimanngisaannarlunili. Paasissutissanik anaanaasoq akuersitillugu atuarfimmit, peqqinnissaqarfimmit MISI-millu pissarsiniartoqarsimavoq.

2 c) Tassanngaanniit isumaqatigiissutigineqarpoq angerlarsimaffimmi atuartitsiner-mut periarfissat misissorneqassasut, MISI-llu [anaanaasoq] oqaloqatigiumallugu aggeqqullugu arlaleriarluni qinnuigisarsimagaluarpa, taannali ataasiaannarluni takkussimalluni. Aamma isumaqatigiissutigineqarpoq tarnip pissusiinik ilisimasalik [...] sa-paatit akunneri pingasut qaangiuppata angerlarsimaffimmut pulaassasoq naliliissa-sorlu.

2 d) Nakorsap ernummateqarluni allagai aallaavigalugit kommuni iliuseqarsimaner-soq takusinnaanngilara, suliami allattuiffimmi allattuisoqarsimanngimmat.

2 e) [Meeqqat tarningisa pissusiinik ilisimasallip] ernummateqarluni allannerata kingornatigut [anaanaasoq] oqaloqatigineqarnissaanut aggeqqullugu qinnuigineqarpoq, oqaloqatigiinnissarli kinguartinneqarluni.

2 f) Kigutileriffimmit nalunaarutiginninneq eqqarsaatigalugu allattuisoqarsimanngilaq, [meerarli] ineeqqami avataanut attaveqarfeqanngitsoq oqaatigineqarluni, ersisarnini nikallungarujussuarninilu pissutigalugit.

[...] (Ombudsmandeqarfimmi nutsigaavoq)

Kommunip uannut oqaaseqaammini 9. marts 2022-meersumi ilaatigut makku oqaatigai:

“[...]

2. Meeqqat tarningisa pissusiinik ilisimasallip [...-p] nalunarutiginninnera 11.02.2020-meersoq tiguneqartoq eqqarsaatigalugu isumaginninnermi suliamik suliarinnittup, MISI tarnip pissusiinik ilisimasallip, atuarfimmi siunnersortip aamma psykiatrisk ambulatoriami meeqqanut inuusuttunullu tunngasuni tarnip pissusiinik ilisimasallip suliami susassaqtutut ataatsimeeqatigiinnissaat isumaqatigiissutigineqarpoq – ilanngussaq 2-tut ilanngunneqarpoq.

[...]

4. Atuarfiup pisortaata nalunaarutiginninnerata 24.09.2018-imi ullulernerqarsimasup tiguneqarnerata kingornatigut tamanna pappialanngorlugu allanneqarsimavoq, mappimullu suliami allagaatinik imalimmut ikineqarsimalluni. [Anaanaasoq] oqaloqatigineqarnissaminut 5. oktober 2018-imi aggeqquneqarsimavoq. Allakkiat ilanngunneqarput. ILANNGUSSAQ 3

[...]” (Ombudsmandeqarfimmi nutsigaavoq)

Ilanngussami 2-mi ilaavoq allaffiup iluani atugassatut e-maili, suliami susassa-qartut ataatsimiinnermi aalajangiinerat pillugu allakkiamik 13. januar 2020-meersumik imaqartoq.

Ilanngussami 3-mi ilaavoq allakkiaq arfinilinnik quppernilik assammik allataq 8. oktober 2022-meersaq paasisinnaasimanngisara.

Kommunip uannut oqaaseqaammini 8. juli 2022-meersumi ilaatigut makku oqaatigai:

“[...]

3. Atuarfimmi ilinniartitsisup 2. februar 2018-imi nalunaarutiginninnera eqqarsaatigalugu Qeqqata Kommunianalunaarutiginninneq pillugu qisuariarsimanersoq suliami ajoraluartumik allanneqarsimanngilaq.

[...]” (Ombudsmandeqarfimmi nutsigaavoq)

4.2. Tapersersortitut ikiortimik atorfinitsitsinissaq pillugu ilitersuineq

Kommunip uannut oqaaseqaataanit 8. juli 2022-meersumit makku erseput:

[...]

1. Qeqqata Kommuniani Atugarissaanermut Immikkoortortaqrifiup oqaatigisinnaavaa tapersersortitut ikiorti eqqarsaatigalugu aatsaat 30.03.2021-mi siunnersuisoqarlunilu ilitersuisoqarsimasoq, taamaattumillu [anaanaasoq] tapersersortitut ikiortitut atorfinitsinneqarsimasoq, sulilu tassani atorfeqartitaasoq.

Kommuni ilitersuisussaataaernerminik eqqortitsisimasoq kommuni isumaqarnersoq eqqarsaatigalugu [anaanaasoq] meeqqaminut tapersersortitut ikiortasinnaaneq eqqarsaatigalugu sooq ilitersorneqarsimannginnersoq nassuiarsinnaanngilara. Tamanna suliami allanneqarsimanngilaq.

[...]” (Ombudsmandeqarfimmi nutsigaavoq)

5. Uanga paasinninnera naliliineralu

5.1. Kommunip nalunaarutiginninnernik tigusaqarnermi iliuseqartus-saatitaanera

5.1.1. Kommunip nalunaarutiginninnernik tigusaqarnermi iliuseqartus-saatitaaneranik uanga paasinninera

5.1.1.1. Meeqqap ukiumi atuarfiusumi 2017-2018-imi atuangitsoortarnera pillugu nalunaarutiginninneq siullesq 3. november 2017-imeersoq kommunip atuarfimmit e-mailikkut 8. november 2017-imi tiguaa.

Kommunip uannut oqaaseqaammini 30. november 2021-meersumi uppersarsarlugu oqaatigaa nalunaarutiginninneq taanna tiguneqarsimasoq. Kommunilli tamatumunnga peqatigitillugu oqaatigaa nalunaarutiginninneq taanna nalunaarsuiffimmi allanneqarsimanngitsoq, kiisalu nalunaarutiginninneq taanna qanoq iliuseqarnissamut pissutissaqalersitsimanersoq suliami allagaatini suliamiluunniit allattuiffimmi allattukkani takuneqarsinnaanngitsoq.

5.1.1.2. Nalunaarutiginninnerit aappaat meeqqap atuangitsoortarneranut eqqarsartaatsikkullu peqqissusianut tunngasoq kommunip atuarfimmi ilinniartitsisumit 2. februar 2018-imi tiguaa.

Kommunip uannut oqaaseqaammini 8. juli 2022-meersumi oqaatigaa nalunaarutiginninnerup taassuma tiguneqarneranut atatillugu kommunip suliami suliarinERIAASIANI allattuisoqarsimanngitsoq.

5.1.1.3. Nalunaarutiginninnerit pingajuat meeqqap atuangitsoortarneranut tunngasoq kommunip atuarfimmit 24. september 2018-imi tiguaa.

Oqaatigaara kommunip oqaaseqaatai 30. november 2021-meersoq aamma 9. marts 2022-meersoq imminnut naapertuutinngitsut, tassami nalunaarutiginninnerup 24. september 2018-imeersup qanoq illiuseqarnissamut pissutissaqalersitsisimanagera pillugu paasissutissat imminnut assortuuttut kommunip saqqummiummagit.

Kommunip uannut oqaaseqaammini 30. november 2021-meersumi oqaatigaa kommunip anaanaasoq nalunaarutiginninneq taanna tunngavigalugu oqaloqatigineqarnissaanut 24. september 2019-imi aggeqqusimagaa, ilaqutariinnillu sullissivimmuut innersuussut suliarisimagaa. Oqaatigaara kommunip ataatsimiinneq nalunaarutiginninnerup tiguneqarnerata kingornatigut ukioq ataaseq qaangiuttoq pisimasoq innersuussutigisimagaa.

Anaanaasoq 24. september 2019-imi oqaloqatigineqarnissaminut 24. september 2019-imi aggeqquneqarsimanersoq suliami allagaatini takusinnaangilara. Taamatuttaaq aggeqqusissutip, ataatsimiigiaqqusilluni aggeqqusineq pillugu allakkiap ullorluunniit taanna ataatsimiinneq pillugu imaqarniliap assilineri nas-saarisinnaangilakka.

Paasisara unaavoq anaanaasup ilaqutariinnik sullissivimmuut innersuussinermi immersugassaq 22. marts 2021-mi aatsaat immersorsimagaa. Oqaatigaara immersugassaq taanna kommunimit atsiorneqarsimangitsoq naqissuseqarneqarsimangitsorluunniit.

Kommunip uannut oqaaseqaammini 9. marts 2022-meersumi oqaatigaa nalunaarutiginninneq 24. september 2018-imeersoq kommunip pappialanngorlugu allasimagaa, taannalu mappimut suliami allagaatinik imalimmut ikisimallugu.

Kommunip oqaaseqaataa 9. marts 2022-meersoq suliamilu allagaatit tunngavigalugit paasisara unaavoq kommunip anaanaasoq nalunaarutiginninneq tunngavigalugu 5. oktober 2018-imi oqaloqatigineqarnissaanut allakkatigut 27. september 2018-imeersutigut aggeqqusimagaa.

Ataatsimiinneq taanna ingerlanneqarsimanersoq iluamik paasingilara, suliamili allagaatini ilaavoq allakkiq arfinilinnik quppernilik assammik allataq 8. november 2018-imeersoq. Allakkiq taanna paasisinnaangilara, taamaattumillu imai suunersut ataatsimiinnerluunniit taanna qanoq inernilerneqarsimanersoq paasisinnaanagu.

5.1.1.4. Nalunaarutiginninnerit sisamaat meeqqap eqqarsartaatsikkut peqqissusiata qanoq issusianut tunngasoq kommunip tarnip pissusiinik ilisimasalimmit 13. september 2019-imi tiguaa.

Kommunip uannut oqaaseqaammini 30. november 2021-meersumi oqaatigaa meeqqap "angerlarsimaffimmi atuartitsinissamut periarfissai misissorneqassasut isumaqatigiissutigineqarsima[s]oq." Kommunip aammattaaq oqaatigaa MISI-p anaanaasoq nalunaarutiginninneq tunngavigalugu oqaloqatigineqarnissaanut arlaleriarluni aggeqqusarsimagaa, anaanaasorli takkuttarsimanngitsoq. Kommunip aammattaaq oqaatigaa kommunip tarnip pissusiinik ilisimasalik sapaatit akunneri pingasut qaangiuppata angerlarsimaffimmut pulaassasoq pissutsillu naliliiffigissagai isumaqatigiissuteqarfisimagaa.

Tarnip pissusiinik ilisimasallip angerlarsimaffimmi pulaarneq tunngavigalugu naliliinerinik angerlarsimaffimmulluunniit pulaarnerit pillugit naliliisoqarnissaanik kommunip nukingisaarutaanik suliami allagaatini nassaangilanga.

Suliami allagaatit aallaavigalugit paasisara unaavoq kommunip anaanaasoq 7. oktober 2019-imi oqaloqatigineqarnissaanut 25. september 2019-imi aggeqqusimagaa. Suliami allattuiffimmi allatamit 7. oktober 2019-imi ataatsimiinnermut tunngasumit 24. oktober 2019-imi suliarineqarsimasumit erserpoq tarnik pissusiinik ilisimasallip nalunaarutiginninnermik nassiussisimanera anaanaasup nalungikkaa, taamaattumillu ikiorserneqarnissani neriutigigaa. Suliami allattuiffimmi allatamit erserpoq suliamik suliarinnittup paasinninnera unaasoq anaanaasup panini eqqarsaatigalugu ikiorserneqarnissani pisariaqartikkaa.

5.1.1.5. Nalunaarutiginninnerit tallimaat meeqqap imminut toqunnissamik eqqarsaateqartarneranut imminullu ajoqusertarluni pissusilersorneranut tunngasoq kommunip nunap immikkoortuani nakorsamit 26. november 2019-imi tiguaa.

Kommunip uannut oqaaseqaammini 30. november 2021-meersumi oqaatigaa nalunaarutiginninneq taanna suliami allattuiffimmi allanneqarsimanngitsoq, taamaattumillu kommuni nalunaarutiginninneq tunngavigalugu iliuseqarsimanersoq kommunip takusinnaangikkaa.

5.1.1.6. Nalunaarutiginninnerit arfernat meeqqap atugarissaarneranut tunngasoq kommunip meeqqat tarningsa pissusiinik ilisimasalimmit 10. januar 2020-mi tiguaa.

Kommunip uannut oqaaseqaammini 30. november 2021-meersumi oqaatigaa up-
pernarsarlugulu kommunip anaanaasoq oqaloqatigineqarnissaanut 10. januar
2020-mi aggeqqusimagaa. Ataatsimiinnissarli taanna suliamik sularinnittumit
taamaatinneqarsimavoq, kingusinnerusukkullu ingerlanneqarsimanani.

Suliami allagaatinit erserpoq suliami susassaqtut 13. januar 2020-mi ataatsi-
miissimasut.

Uanga naliliinera unaavoq ataatsimiinneq taanna tapersersuinermi iliuuserpiaan-
ngitsoq, naak kommunip ataatsimiinneq suliami susassaqtut ataatsimiinne-
rattut taasimagaluaraa. Meeqqanik tapersersuisarneq pillugu inatsimmi § 21-k-
kut aalajangersarneqarpoq tapersersuilluni suliniuteqartoqannginnerani meeraq
oqaloqatigineqartassasoq, isumaginninnikkut misissuisoqartassasoq iliuusissa-
nullu pilersarut sularineqartassasoq. Kommuni taamaaliorsimangitsoq takusin-
naavara. Aamma oqaatigaara tamanna ataatsimiinnerni kommunip suliami su-
sassaqtut ataatsimiinnerinik taasaani tamani atuuttoq.

Ataatsimiinneq 13. januar 2020-mi ingerlanneqartoq nalunaarutiginninnermik
10. januar 2020-meersumik tunngaveqarluni ingerlanneqarsimanersoq imaluun-
niit kommunip nalunaarutiginninnermik tigusaqarnera sioqqullugu pilersaarutigi-
neqareersimanersoq paasingilara.

Kommunip uannut oqaaseqaammini 13. januar 2020-meersumi oqaatigaa sulia-
mi susassaqtut nalunaarutiginninneq 11. februar 2020-meersoq tunngaviga-
lugu ataatsimiissimasut. Kommunip aalajangiineq pillugu allakkiaq 13. januar
2020-meersoq tamatumunnga atatillugu innersuussutigaa. Paasisara unaavoq
kommunip nalunaarutiginninneq 10. januar 2020-meersoq, imaanngitsoq 11. fe-
bruar 2020-meersoq, oqaaseqaammi 9. marts 2022-meersumi innersuussutigigi-

gaa, tassami suliami susassaqtut nalunaarutiginninneq sulii tiguneqarsimanngitsoq pillugu ataatsimiissinnaangimmata.

Tamanna tunngavigalugu manna tunngaviutippara, tassalu kommunimi suliami susassaqtut nalunaarutiginninneq 10. januar 2020-meersoq tunngavigalugu 13. januar 2020-mi ataatsimiissimasut.

Suliami allagaatinit aamma erserpoq kommunip anaanaasoq taassuma angerlarsimaffiani 17. januar 2020-mi ataatsimeeqatigisimagaa. Kommunip nalunaarutiginninneq 10. januar 2020-meersoq anaanaasumut oqaloqatiginnissutigisimaneeraa suliami allattuiffimmi allatami ataatsimiinneq taanna tunngavigalugu suliarineqarsimasumi takuneqarsinnaangilaq.

Kiisalu suliami allagaatinit erserpoq anaanaasup 7. februar 2020-mi ataatsimeeqatigineqarnissaa kommunip pilersaarutigisimagaa, ataatsimiinnerli taanna ingerlanneqarsimanngitsoq, anaanaasormi napparsimanini pissutigalugu takkusinnaanani nalunaarsimammat.

5.1.1.7. Nalunaarutiginninnerit arfineq aappaat meeqqap atugarissaarneranut, ineriartorneranut atuarnanullu tunngasoq kommunip meeqqat tarningsa pissusiinik ilisimasalimmit 11. februar 2020-mi tiguaa.

Kommunip uannut oqaseqaammimi 9. marts 2022-meersumi oqaatigaa suliami susassaqtut tamanna tunngavigalugu meeraq pillugu ataatsimiissimasut. Suliami susassaqtut ulloq taanna ataatsimiissimanerat pillugu e-maili kommunip iluani atugassatut suliarineqarsimasoq 13. januar 2020-meersoq kommunip oqaseqaammut kakkiullugu nassiuppaa.

Immikkoortumi 5.1.1.6-imi oqaatigineqartut taanna tassaavoq suliami susassaqtut ataatsimiinnerat kommunip innersuussutigisaa, nalunaarutiginninnerup tiguneqarnera sioqqullugu kommunip ingerlassimasaa, taamaattumillu suliami susassaqtut 13. januar 2020-mi ataatsimiissimanerat nalunaarutiginninnermut 11. februar 2020-meersumut sutigut ataneqarnerasoq paasiuminaatsippara. Taamaattumik ilimagisara unaavoq suliami susassaqtut nalunaarutiginninneq 10.

januar 2020-meersoq, imaanngitsoq nalunaarutiginninneq 11. februar 2020-meersoq, tunngavigalugu ataatsimiinnerat 13. januar 2020-mi ingerlanneqarsimasoq.

Suliami allagaatinit erserpoq kommunip anaanaasoq 11. februar 2020-mi aamma 18. februar 2020-mi attaveqarfigisimagaa, angerlarsimaffimmut pulaarsinnaanermut periarfissaq oqaloqatiginnissutiginiarlugu. Tamatumunnga atatillugu angerlarsimaffimmut pulaartoqarsimanersoq suliami allagaatini takusinnaangilara.

Suliamili allagaatit tunngavigalugit paasisara unaavoq angerlarsimaffimmut pu-larneq MISI-mit 16. september 2020-mi aamma 15. oktober 2020-mi aatsaat ingerlanneqarsimasoq.

Suliami allagaatinit aamma erserpoq kommunip anaanaasoq 24. april 2020-mi ataatsimeeqatigisimagaa. Suliami allattuiffimmi allatamit ataatsimiinneq taanna tunngavigalugu suliarineqarsimasumit erserpoq iliuusissanut pilersaarutip suliarineqarnissaa innersuussutigineqarsimasoq, kisiannili isumaginninnikkut misissuinerup suliarineqarnissaa innersuussutigineqarani.

5.1.1.8. Nalunaarutiginninnerit arfineq pingajuat meeqqap kigutunik misissuiner-mut piffissami sivisunerusumi takkuttarsimannginneranut tunngasoq kommunip kigutigissaavimmit 14. maj 2020-mi tiguaa.

Kommunip uannut oqaaseqaammini 30. november 2021-meersumi oqaatigaa nalunaarutiginninneq taanna eqqarsaatigalugu kommuni allattuisimannngitsoq.

Oqaatigaara suliami allattuiffimmi allatamit 3. juli 2020-meersumit ersertoq kommunip nalunaarutiginnittartulerisui aamma anaanaasoq 2. juli 2020-mi ataatsimiissimasut. Suliami allattuiffimmi allatami oqaatigineqarpoq anaanaasoq panimminik ikiuisinnaassaguni sakkussaminik amigaateqartoq.

5.1.2. Kommunip nalunaarutiginninnermik tigusaqarnermini iliuseqartussaataaneramik uanga naliliiviginninnera

5.1.2.1. Kommuni nalunaarutiginninnernik 3. november 2017-imi, 2. februar 2018-imi, 24. september 2018-imi, 13. september 2019-imi, 26. november 2019-imi, 10. januar 2020-mi, 11. februar 2020-mi aamma 14. maj 2020-mi tigusaqartarsimavoq. Uanga naliliinera unaavoq kommuni nalunaarutiginninner-nik tigusaqartarnermi arlaannaanniluunniit nalunaarutiginninnerit isumaginnin-nikkut misissuineramik aallartitsinermit pissutissaqalersitsinersut inatsisikkut aa-lajangersagaasutut nal. ak. 24-t iluanni tamatumaluunniit kingornatigut aalaja-ngiisarsimangitsoq.

Isumaqarpunga kommunip inatsimmi malittarisassat meeqqat inuusuttullu im-mikkut pisariaqartitativik naapertorlugit tapersersuineramik neqeroorfigineqartar-nissaannik qulakkeerisut ilungersunartumik malinngitsoortarsimagai. Uanga paa-sinninnera unaavoq piffissap ukiut pingasut sinnerlugit sivisussusillip ingerlasi-manera isiginiarlugu tamanna akuerineqarsinnaanngilluinnartoq.

5.1.2.2. Oqaatigaara uanga ataasiinnarmk paasineqarsinnaasumik paasisara u-naasoq nalunaarutiginninnerit isumaginninnikkut misissuineramik aallartitsiner-mut pissutissaqalersitsinersut kommunip aalajangiisarsimanginnerata meeqqap ikiorneqarnermik pisariaqartitativimik sapinngisamik pilertornerpaamik neqeroor-figineqarnissaa siviisoorujussuarmik kinguarsarsimagaa.

5.1.2.3. Malugaara kommunip uannut oqaaseqaammuni 9. marts 2022-meersu-mi oqaatigigaa isumaginninnikkut misissuineq taamani suli ingerlanneqarsiman-ngitsoq.

5.2. Kommunip tapersersortitut ikiortimik atorfinitsitsineq pillugu ilit-sersuineria

5.2.1. Kommunip tapersersortitut ikiortimik atorfinitsitsineq pillugu ilit-sersuineria pillugu paasisakka

5.2.1.1. Uanga paasisara unaavoq anaanaasup allakkat 25. juni 2019-imeersut kommunip qinnuiginninneratigut allassimagai.

Suliami allattuiffimmi allatami 24. april 2020-meersumi ulloq taanna ataatsimiis-simanermut tunngasoq aamma suliami allattuiffimmi allatami 2. juli 2020-mi ataatsimiissimaneq tunngavigalugu suliarineqarsimasoq aallaavigalugit paasisara unaavoq tapersersortitut ikiortimik atorfinitsitsinissamut periarfissaq suliamik suliarinnittup anaanaasullu oqaloqatigiissutigisimagaat. Suliami allattuiffimmi allatani takuneqarsinnaanngilaq tapersersortitut ikiortitut atorfinitsinneqarnissami-nik anaanaasup nammineq qinnuteqaateqarsinnaaneranut periarfissaqarnera suliamik suliarinnittup anaanaasumut ilitsersuutigisimaneraa.

Suliami susassaqtut 23. november 2020-mi ataatsimiinnerat pillugu suliami allattuiffimmi allataq tunngavigalugu paasisara unaavoq anaanaasup allakkatigut qinnuteqaat nassiunniaraa, panimminut tapersersortitut ikiortitut atorfinitsinneqarumalluni qinnuteqaatigalugu.

Anaanaasoq tapersersortitut ikiortitut atorfinitsinneqarumalluni qanoq iliorluni qinnuteqaateqassanersoq ataatsimiinnermi tassani ilisimatinneqarsimansoq suliami allattuiffimmi allatami takuneqarsinnaanngilaq. Kommunip tapersersortitut ikiortimik atorfinitsitsisoqarnissaa sioqqullugu meeqqamik oqaloqateqartussaananeramik, isumaginninnikkut misissuineramik ingerlatsisussaananeramik iliuusissanullu pilersaarummik suliarinnittussaananeramik kommunip anaanaasoq paasitissimaneraa suliami allattuiffimmi allatami taamatuttaaq takuneqarsinnaanngilaq. Kiisalu tapersersortitut ikiortimik atorfinitsitsinerup piffissami aalajangersimasu-mik sivisussusilimmi aallaavittut atuuttussaananera kommunip anaanaasumut ilitsersuutigisimaneraa suliami allattuiffimmi allatami takuneqarsinnaanngilaq.

E-maili kommunip iluani atugassaq 16. december 2020-meersoq aamma allakkiaq kommunip iluani atugassaq 4. januar 2021-meersoq tunngavigalugit paasisara unaavoq meeqqamut tapersersortitut ikiortitut nammineq atorfinitsinneqarumalluni qinnuteqaat anaanaasup Atugarissaanermut Immikkoortortaqarfik sulleqatigalugu nassiussinnaagaa. E-mailimi 16. december 2020-meersumi oqaatigineqarpoq anaanaasoq "tamanna pillugu tusagaqarsimanngitsoq".

Oqaatigaara kommunip uannut oqaaseqaammuni 8. juli 2022-meersumi oqaatigigaa anaanaasup panimminut tapersersortitut ikiortitut atorfinitsitsineq eqqarsaa-

tigalugu aatsaat 30. marts 2021-mi siunnersorneqarsimasoq ilitsersorneqarsimasorlu.

5.2.2. Kommuniptapersortitut ikiortimik atorfinitsitsineq pillugu ilitsersuineranik uanga naliliiviginninnera

5.2.2.1. Suliassat suliarineqartarnerat pillugu inatsimmi § 7, imm. 1 tunngavigalugu kommunip ilitsersuisussaataitanerani immikkoortumi 3.2-mi allaaserineqartut tunngavigalugit uanga paasinninnera unaavoq kommunip anaanaasoq tapersortitut ikiortimik atorfinitsitsinissamut periarfissaq, matumani anaanaasup nammineq tapersortitut ikiortitut atorfinitsinneqarsinnaaneranut periarfissaq ilanngullugu eqqarsaatigalugu, pillugu ulluni ukunani ilitsersorsimasariaqaraluaaraa:

- 12. september 2018-imi akuersineq uppenarsarlugu atsiorderani
- 25. juni 2019-imi allakkatigut saaffiginninnerani
- 7. oktober 2019-imi ataatsimiinnermi akuersinerlu uppenarsarlugu atsiorderani
- 23. oktober 2019-imi akuersineq uppenarsarlugu atsiorderani
- 6. december 2019-imi ataatsimiinnermi
- 17. januar 2020-mi ataatsimiinnermi
- 11. februar 2020-mi oqaloqatigiinnermi
- 18. februar 2020-mi oqaloqatigiinnermi
- 14. april 2020-mi allakkatigut saaffiginninnerani 20. april 2020-milu nukingisaarinerani
- 24. april 2020-mi ataatsimiinnermi
- 2. juli 2020-mi ataatsimiinnermi akuersinerlu uppenarsarlugu atsiorderani
- 16. september 2020-mi oqaloqatigiinnermi
- 15. oktober 2020-mi oqaloqatigiinnermi
- 9. november 2020-mi oqaloqatigiinnermi
- 23. november 2020-mi katsorsaanermut atatillugu ataatsimiinnermi

Uanga paasinninnera unaavoq anaanaasup ulluni qulaani taaneqartuni tamani panimmi ikiorneqarnissaa qinnutigigaa kommunip erseqqissumik takusinnaasimagaa.

Kommunip anaanaasoq tapersersortitut ikiortimik atorfinitsitsinissamut periarfissaq, matumani anaanaasup nammineq tapersersortitut ikiortitut atorfinitsinneqarsinnaaneranut periarfissaq ilanngullugu eqqarsaatigalugu, ulluni qulaani taaneqartuni ataatsimiinnerit arlaannaanniluunniit ilitsersorsimaneraa suliami allagaatini takusinnaanngilara.

Tamanna tunngavigalugu uanga naliliinera unaavoq kommuni ullut qulaani taaneqartut arlaannaanniluunniit suliaassat suliarineqartarnerat pillugu inatsimmi § 7, imm. 1 tunngavigalugu ilitsersuisussaataitanerminik eqqortitsisimangitsoq.

Uanga naliliinera aammattaaq unaavoq anaanaasup ilitsersorneqarnissamik pisariaqartitaanik kommunip tunniussisimanginnera anaanaasup paniatalu pisinnaatitaaffimminnik ilungersunartumik annaasaqarnerannik nassataqarsimasoq.

Ataatsimut isiginnillunga isumaqarpunga kommunip anaanaasumik ulluni taaneqartuni ilitsersuisarsimanginnera isorisarialerujussusoq.

5.2.1.2. Anaanaasup kommuni ilitsersoqqulluni toqqartumik erseqqissumillu qinnuigisimasuuppagu suliaassat suliarineqartarnerat pillugu inatsimmi § 7, imm. 1-ikkut aalajangersarneqarpoq kommunip anaanaasoq ilitsersussallugu inatsit tunngavigalugu pisussaaffigigaa. Kommunip ilitsersuisussaataitanera anaanaasup pissusiviusut inatsiseqartitsinikkulluunniit pissutsit pillugit saqqummiussineratigut atuutilereerpoq, tamatumami kommunip inatsiseqartitsinikkut tunngavigisaaq suliamut attuumassuteqartoq pillugu oqaaseqaateqarnissaanut pissutissaqalersissimasariaqaraluarmagu.

Uanga paasinninnera unaavoq kommuni suliami isumaginninnermut tunngasumi oqimaatsumi matumanisut ittumi nammineq suliniuteqarnermigut (ex officio) ilitsersuinissaminut atituumik pisussaaffeqartoq, kommunilu

- inatsiseqartitsinikkut tunngavigisaq tapersersortitut ikiortimik atorfinitsitsinermut atuuttoq pillugu ilitsersuisimasariaqaraluartoq, matumani tapersersortitut ikiortimik atorfinitsitsineq sioqqullugu kommunip meeqqamik oqalogaqateqartussaataitanera (meeqqanik tapersersuisarneq pillugu inatsimmi § 43), isumaginninnikkut misissuinermik ingerlatsisussaataitanera (meeqqanik tapersersuisarneq pillugu inatsimmi § 45) aamma iliuusissanut pilersaarummik suliarinnittussatitanera (meeqqanik tapersersuisarneq pillugu inatsimmi § 46) ilanngullugit eqqarsaatigalugit,
- anaanaasup nammineq tapersersortitut ikiortitut atorfinitsinneqarumalluni qinnuteqaateqarsinnaanera taamalu panimminik isumassuinerata aningaasatigut matussuserneqarnissaa pillugu ilitsersuisimasariaqaraluartoq,
- tapersersortitut ikiortimik atorfinitsitsinermi periaaseq pillugu ilitsersuisimasariaqaraluartoq, matumani anaanaasoq atorfinitsinneqassappat atugassarititaasut immikkut ittut ilanngullugit eqqarsaatigalugit,
- anaanaasup panimminut tapersersortitut ikiortitut atorfinitsinneqassaguni piumasaqaataasunik oqinnerpaamik pitsaanerpaamillu qanoq iliorluni eqqortitsisinnaanera pillugu ilitsersuisimasariaqaraluartoq aamma
- anaanaasup tapersersortitut ikiortitut atorfinitsinneqassaguni paasissutissanik sunik nammineq tunniussinissaa pillugu ilitsersuisimasariaqaraluartoq, matumani qinnuteqaammut taamaattumut atatillugu immersugassaq immikkut ittoq atorneqassanersoq ilanngullugu eqqarsaatigalugu.

Oqaatigaara anaanaasup qinnuteqaateqarnermi immersugassaqarpat qinnuteqaateqarnermi immersugassanik immersuinerani kommunip ikiuisussaataitanera kommunip ilitsersuisussaataitanerata nassatarigaa, tak. immikkoortoq 3.2.

5.2.2.3. Suliami allagaatinit erserpoq kommunip anaanaasullu 10. januar 2020-mi ataatsimiinnissaat pilersaarutigineqartoq. Ataatsimiinnissaq taanna suliamik suliarinnittup taamaatippaa. Ataatsimiinnissap 10. januar 2020-mi pisussap taamaatinneqarnerani kommuni ataatsiminnissamut ullormik allamik aalajangiiniarsimanersoq imaluunniit tapersersortitut ikiortimik atorfinitsitsinissaq, matumani anaanaasup nammineq tapersersortitut ikiortitut atorfinitsinneqarumalluni qinnuteqaateqarnissaanut periarfissaqarnera ilanngullugu eqqarsaatigalugu, pillugu

ilitersuiniarluni anaanaasumut saaffiginnissimansoq suliami allagaatini taku-neqarsinnaanngilaq.

Suliami allagaatinit aamma erserpoq kommuni suliami susassaqtunik meeraq pillugu ataatsimiititsisimasoq. Paasisara unaavoq anaanaasoq ataatsimiinnermi tassani peqataasimasoq. Aalajangiineq pillugu allakkiami suliamillu allattuiffimmi allatami suliami susassaqtut ataatsimiinnerat tunngavigalugu suliarineqarsimasuni oqaatigineqarpoq suliamik suliarinnittup meeqqamut inuit innarluutillit tapersorsorneqarnissaanut Inatsisartut inatsisaat nr. 13, 12. juni 2019-imeersoq (matuma kingornatigut innarluutillit pillugit inatsimmik taaneqartartussaq) tunngavigalugu tapersersuineramik attaveqarfeqarnermilluunniit aqqissuussinerup aallartinneqarnissaanut periarfissaq suliami susassaqtut tullianik ataatsimiinnissaanut misissussagaa. Kommunip anaanaasoq suliami susassaqtut tullianik ataatsimiinnissaat sioqqullugu tamatumingna ilitsersorsimaneraa takusinnaanngilara.

Kommunip 10. januar 2020-mi aamma 13. januar 2020-mi ataatsimiinnernut malitseqartitsiviginnissimanninnera pitsaanngitsorujussuartut isigaara.

5.3. Kommunip tapersersuinermi suliniutit pillugit aalajangiinera

5.3.1. Kommunip tapersersuinermi suliniutit pillugit aalajangiinera pillugu uanga paasinninnera

5.3.1.1. Suliami allagaatinit erserpoq kommunip nalunaarutiginninnerit katillugit arfineq pingasut tigusiagai. Immikkoortumi 5.1.2.1-imi oqaatigineqartutut uanga naliliinera unaavoq nalunaarutiginninnerit taakku arlaannaalluunniit kommunip naammattumik qisuariarfigisimannigikkaa, isumaginninnikkummi misissuineramik aallartitsinermut tunngavissaqarnersoq kommuni sukkulluunniit aalajangiisimannigimmat.

Nalunaarutiginninnerit imarisaat pillugit oqaatigaara

- nalunaarutiginninnermit 24. september 2018-imeersumit ersertoq nalunaarutiginnittoqartoq kommunip anaanaasumik ingerlaannartumik ikiuisinnaanissaa neriuutigalugu,
- nalunaarutiginninnermit 13. september 2019-imeersumit ersertoq meeraq ima kinguariarsimatigisoq MISI-p ammasumik siunnersuinissamik ilitsersuinissamillu neqeroorutaani ilaatinneqarsinnaajunnaarsimalluni, kiisalu nalunaarutiginnittoqartoq meeqqap attaveqarfeqalernissamut tapersersortitulluunniit ikiortilerneqarnissamut innersuunneqarsinnaanera neriuutigalugu,
- nalunaarutiginninneq 26. november 2019-imeersoq siusinnerusukkut nalunaarutiginninnerit eqqarsaatigalugit sakkortunerusutut isigigiga, nunammi immikkoortuani nakorsap oqaatigimmagu meeraq imminut toqqunnissamik eqqarsaateqartartutut imminullu ajoquserartutut pissusilersortarnermik ilisarnaateqartoq kiisalu tapersersuinikkut attaveqarfiliinikkulluunniit kommunip ikiorsiinissaa utaqqineqartoq,
- nalunaarutiginninnermit 10. januar 2020-meersumit ersertoq meeqqap atugarliortutut nanertuuteqartutullu ilisarnaateqarnera meeqqat tarningsa pissusiinik ilisimasallip ernumanartorujussuurtutut isigigaa kiisalu meeqqat tarningsa pissusiinik ilisimasalik naliliisoq meeqqap atugarliuuteqarnera nanertuuteqarneralu ima annertutigisut piffissaliussap naapertuuttumik siviussusillip iluani iliuuseqartoqarnissaa pisariaqarluni aamma
- nalunaarutiginninnermit 11. februar 2020-meersumit ersertoq meeqqat tarningsa pissusiinik ilisimasallip meeraq ilaqutaalu pillugit ernummateqarnini sakkortunerpaamik oqaatigigaa, oqaatigigamiummi pissutsit pitsaanngitso-rujussuusut attanneqarsinnaanngitsullu.

5.3.1.2. Suliami allagaatit tunngavigalugit paasisara unaavoq kommunip anaanaasoq arlaleriaqaluni ataatsimeeqatigisarsimagaa oqaloqatigisarsimagalu, tamannali tunngavigalugu tapersersuinialuni iliuutsinik sukkulluunniit aallartitsisimangitsoq tapersersuinialuniluunniit iliuutsinik aallartitsisoqarnissaa pisariaqartinneqarnerasoq aalajangiisimangitsoq. Tamatumunnga atatillugu immikkoortoq 5.2 innersuussutigaa.

5.3.1.3. Suliami allagaatinit erserpoq suliamik suliarinnittoq atuarfiup pisortaanut 2017-ip naanerani saaffiginnissimasoq. Saaffiginninnermi ilaatigut oqaatigi-

neqarpoq ilaqutariinnik isumasioqatiginninnermik aallartitsineq tulluurtuusooq kii-salu suliamik suliarinnittup, anaanaasup ataataasullu 2. januar 2018-imi ataatsimiinnissaat pilersaarutigineqartoq. Ataatsimiinneq taanna pillugu imaqarniliaq suliami allagaatini ilaanngilaq, taamaattumillu ilumut ataatsimiittoqarsimanersoq takusinnaangilara.

Atuarfiup anaanaasumik 30. august 2018-imi ataatsimeeqateqarsimanera atuarfiup kommunimut 4. september 2018-imi ilisimatitsissutigaa. Atuarfiup ilisimatitsissutitut allakkamini oqaatigaa anaanaasup ikiorneqarnissamik pisariaqartitsinera erseqqittoq. Atuarfiup aamma oqaatigaa anaanaasup ikiorneqarnera meeqqap atuarnerata ingerlaqqinnerata iluatsinnissaanut aalajangiisuusumik pingaaruteqartoq. Atuarfiup naggasiutitut oqaatigaa kommuni pilertortumik ikior-siiniuteqassasoq atuarfiup neriuutigigaa, siunnersuutigalugulu anaanaasup tarnip pissusiinik ilisimalimmit ikiorneqarnissaa akuersissutigineqassasoq, angerlarsimaffimmiittartumillu aaqqissuussisoqarnissaanut periarfissaq isumaliutersuutigineqassasoq. Kommunip suliniutit taakku isumaliutersuutigisimanerai suliami allagaatini takusinnaangilara.

Kommunimi suliamik suliarinnittoq MISI-mut 8. oktober 2018-imi saaffiginnippoq, meerarlu pillugu suleqatigiinnissaq qinnutigalugu.

Tarnip pissusiinik ilisimasallip allaffimmi atugassatut allattugaanit erserpoq atuarfik suliamillu suliarinnittoq 18. juli 2019-mi ataatsimeeqatigisussaasimagaluarai, ataatsimiinnissarli taanna taamaatinneqarsimasooq. Ataatsimiinnissaq 18. juli 2019-imi ingerlanneqartussa soq taamaatinneqarsimanersoq paasinngilara. Tarnip pissusiinik ilisimasalik suliami allattuiffimmi nammineq atugassatut 2. september 2019-imi allatami allappooq suliamik suliarinnittumit kingusinnerusukkat attaveqarfigineqarsimanani.

Paasisara unaavoq kommunip Ilaqutariinnik Sullissivimmi suliamik suliarinnittoq, MISI, atuarfik kiisalu tarnip pissusiinik ilisimasalik akuersineq uppersarlugu atsiukkat 7. oktober 2019-imeersoq aamma 23. oktober 2019-imeersoq tunngavigalugit e-mailikkut 23. oktober 2019-imeersukkat qinnuigisimagai anaanaasooq panialu pillugit paasisutissanik tunniusseqqullugit.

Tarnip pissusiinik ilisimasallip akissutaa kommunip 23. oktober 2019-imi tiguaa. Atuarfiup akissutaa kommunip 28. oktober 2019-imi tiguaa. Kommuni suliap suliarineqarnerani peqataasut allat akissutaannik tigusaqarsimanersoq kommuniluunniit akissuteqaqqusilluni taakkununga nukingisaarisimanersoq suliami allagaatini takuneqarsinnaangilaq.

Oqaatigaara akuersineq uppernarsarlugu 7. oktober 2019-imi aamma 23. oktober 2019-imi atsiukkat meeqqanik tapersersuisarneq pillugu inatsimmi ilaatigut § 45, imm. 2-mut isumaginninnikkut misissuinermut tunngasumut innersuussisuusut. Akuersineq uppernarsarlugu 2. juli 2020-mi atsiugaq inuit innarluutillit tapersersorneqarnissaannut Inatsisartut inatsisaanni nr. 13-imi, 12. juni 2019-meersumi § 29-mut paasissutissiisussaataanermet utertitsillunilu akiliisussaataanermet tunngasumut innersuussisuusvoq.

Suliami allattuiffimmi allatamit 22. juni 2020-meersumit erserpoq meeraq sakkortuumik nikallungarujussuartartuusoq inuillu akornanniinnissaq sakkortuumik ersigalugu, taamaattumillu kommuni innarluutilinnut tunngasunik suliaassarqarfirmut saaffiginnissimasoq. Suliami allattuiffimmi allatamit aamma erserpoq innarluutilinnut tunngasunik suliaassarfiup pisortaata siunnersuutigisimagaa meeraq innarluutillit pillugit inatsimmi pineqartunut nuunneqassasoq taannalu aqqutigalugu ikiorsiiniuteqarfigineqassasoq. Meeraq pillugu suliaq innarluutilinnut tunngasunik suliaassarfirmut ingerlateqqillugu nassiunneqarsimavoq, kingusinnerusukkulli ilaqutariinnut immikkoortortaqarfirmut utertillugu nassiunneqarsimalluni, meeqqammi innarluutaa suussusilerneqarsinnaangimmat.

Innarluutilinnut immikkoortortaqarfirmi suliamik suliarinnittup napparsimmavimmut e-mailianit 8. juli 2020-meersumit erserpoq kommunip tapersersortitut ikiorti neqeroorutigisinnaagaa kiisalu tapersersortitut ikiortip ilinniagaqarsimasuunissaa pisariaqartoq. Taamatuttaarli oqaatigineqarpoq tapersersortitut ikiortimik atorfinitsitsineq immiini naammannaviangitsaq. Aamma oqaatigineqarpoq anaanaasoq meeqqamik ikiuisinnaassaguni sakkussaminik amigaateqartoq. Taamaattumik suliamik suliarinnittup napparsimmavik suleqatigiumallugu qinnuigaa.

Meeraq pillugu oqaaseqaat suliamik suliarinnittup 15. juli 2020-mi suliaraa. Immersugassami atorineqartumi meeqqanik tapersersuisarneq pillugu inatsimmi kapitalit 7-imit 9-mut innersuussutigineqarput. Tapersersuiniutit suut aallartinneqarnissaat eqqarsaatigineqarsimanersoq oqaaseqaammi oqaatigineqanngilaq.

5.3.2. Kommuni tapersersuiniutit pillugit aalajangiineranik uanga naliliviginninnera

5.3.2.1. Tunngaviuttippara kommunip nalunaarutiginninnermik siullermik 8. november 2017-imi tigusaqarneranit anaanaasup tapersersortitut ikiortitut atorfinitsinneqarumalluni 26. januar 2021-mi qinnuteqaateqarnerata tungaanut piffissami ingerlasumi ukiut pingasut sinnerlugit sivilissuseqartumi kommuni tapersersuiniuteqartoqarnissaanik meeqqanik tapersersuisarneq pillugu inatsimmi § 21 tunngavigalugu sukkulluunniit aalajangiisimanngitsoq.

Uanga paasinninnera unaavoq nalunaarutiginninneq siulleg 8. november 2017-imi tiguneqarmalli meeqqap immikkut pisariaqartitsineranut tapersersuinermit suliniutinik aallartitsinissaq pisariaqartinneqarnersoq aalajangiisussaalluni kommunip ilisimareersimassagaa.

5.3.2.2. Kommunip uannut oqaaseqaammini 30. november 2021-meersumi oqaatigaa anaanaasooq ataatsimiinnissanut takkutinngitsoortartoq, tamannalu piffissap suliamik suliarinninnermut atorineqartup sivilissuneranut pissutaasooq. Anaanaasooq kommunip tapersersuiniutit pillugit meeqqanik tapersersuisarneq pillugu inatsimmi § 21 tunngavigalugu aalajangiinissamut periarfissaanik ajornakusulersitsisumik kommunimik ataatsimeeqateqarnissamut taama takkutinngitsukulatigisimanersoq suliami allagaatini takusinnaanngilara.

Tassani aamma ilaavoq uanga paasinninnerma unaanera kommuni suliami matu-manisut ittumi iliuuseqarnissamut inatsisikkut aalajangersagaasumik pissaaf-feqartoq – aamma pisuni angajoqqaatut oqartussaassusermik tigummiqartup suleqatigineqarnerata ajornakusoorfiini.

Taamaattumik anaanaasoq kommunip tapersersuiniutinik aallartitsisoqarnissaa-
nik ukiut arlallit ingerlaneranni aalajangiisimanginneranut akisussaaffeqarnerar-
lugu kommunip nassuiaataanik tunuartitsinissara sumilluunniit eqqarsarnartor-
taqartinngilara.

Tamanna tunngavigalugu ataatsimut isiginnillunga naliliinera unaavoq kommunip
iliuuseqarnera naammangilluinnarsimasoq, anguniagaqannginnermit ilatsiinnar-
nermillu sunnerneqarsimasoq kiisalu kommuni meeqqamut tapersersuiniuteqar-
toqarnissaanik pissutissaqanngitsumik sivisuallaamik aalajangiiniaasaarsimasoq.
Tamanna akuerineqarsinnaangitsutut isigaara.

6. Eqikkaalluni inerniliineq

Uanga naliliinera unaavoq kommuni nalunaarutiginninnermik arfineq pingasunik
tigusaqartarnermini – inatsit tunngavigalugu nal.ak. 24-t iluanni aalajangiisus-
saagaluarluni – nalunaarutiginninnerit taakku isumaginninnikkut misissuiner-
mik aallartitsinermut pissutissaqalersitsinersut sukkulluunniit aalajangiisimangitsoq.
Kommuni taamaalilluni inatsimmi malittarisassanik meeqqat inuusuttullu immik-
kut pisariaqartitsinitik naapertorlugit tapersersuiner-
mik neqeroorfigineqartarnis-
saannik qulakkeerisunik malinninnissaminik annertoorujussuarmik sumiginnaa-
simavoq. Uanga paasinninnera unaavoq tamanna akuerineqarsinnaangilluin-
nartoq.

Uanga naliliinera aammattaaq unaavoq kommunip anaanaasumik ataatsimeeqa-
tiginnittarnerpassuarmini oqaloqatiginnittarnerpassuarminilu anaanaasumik ilit-
sersuisussaataitanini eqqortissimangikkaa. Kommunip anaanaasoq kommuni-
mit ikiorserneqarnissaminut periarfissaqarneranik, matumani tapersersortit-
ut ikiortitit nammineq atorfinitsinneqarnissaminik qinnuteqarnissaminut periarfis-
saqarnera ilanngullugu eqqarsaatigalugu, ilitersorsimaneraa sukkulluunniit ta-
kusinnaangilara. Kommunip anaanaasumik ilitersuisimanginnera ataatsimut
isiginnillunga isorisarialerujussuartut isigaara.

Kiisalu uanga naliliinera unaavoq nalunaarutiginninnerup siulliup tiguneqarnera-
nit anaanaasup tapersersortitut ikiortitut atorfinitsinneqarumalluni qinnuteqaate-
qarnerata tungaanut kommunip suliamik suliarinnissimanera naammaginngil-

luinnartuusimasoq, anguniagaqannginnermit ilatsiinnarnermillu sunnerneqarsimasoq, kiisalu kommuni meeqqap tapersersuinnermi suliniuteqartoqarnissaanik pisariaqartitsinera eqqarsaatigalugu pissutissaqanngitsumik siviluallaamik aalajangiiniaasaarsimasoq. Kommunip tapersersuinnermi suliniutinik piffissami ukiunit pingasunit sivilunerusumi aallartitsisimannginera akuerineqarsinnaanngitsutut isigaara.

Ataatsimut isiginnillunga naliliinera unaavoq kommunip suliamik suliarinninnera akuerineqarsinnaanngitsoq.

Annertunerusutigut kukkussuteqartoqarsimasoq sumiginnaasoqarsimasorlu isumaqarama Inatsisartut Inatsisinut Ataatsimiititaliaat kommunalbestyrelsilu oqaaseqaat pillugu Ombudsmandi pillugu inatsimmi § 23 tunngavigalugu nalunaarfigaakka.

Allakkat ukua assilinerat anaanaasumut nassiuppara.

Oqaaseqaat manna oqaaseqaammi pineqartut kikkuussusii ilisarnarunnaarsillugit nittartakkakkut tamanut saqqummiunneqarumaarpoq 2022-milu ukiumoortumik nalunaarutinni eqqaaneqarumaarluni.

7. Kommunip malitseqartitsiviginninnera

Uanga naliliinera unaavoq kommuni nalunaarutiginninnermik tigusaqaruni meeqqanik tapersersuisarneq pillugu inatsimmi § 19 eqqortikkumallugu kommunip siunissami qanoq iliuuseqartarnissani pillugu nammineq ilumini tunaartarisassanik aalajangersaanissani isumaliutersuutigisariaqaraa.

Isumaqarpungattaaq innuttaasoq ilitsersorneqarumalluni ikiorneqarumallunilu qinnuiginnippat suliaasat suliarineqartarnerat pillugu inatsimmi § 7, imm. 1 eqqortikkumallugu kommunip siunissami qanoq iliuuseqartarnissani pillugu nammineq ilumini tunaartarisassanik aalajangersaanissani isumaliutersuutigisariaqaraa.

Kiisalu isumaqarpunga tamanna meeqqap immikkut pisariaqartitaanut pingaaruteqartutut kommunalbestyrelsip isigippagu meeqqanik tapersersuisarneq pillugu inatsimmi § 21 tunngavigalugu aalajangiisoqartarnissaa qulakkeerniarlugu kommunip siunissami qanoq iliuuseqartarnissani pillugu nammineq ilumini tunaartarisassanik aalajangersaanissani isumaliutersuutigisariaqaraa.

Kommuni qinnuigaara oqaaseqaatima kommuni qanoq iliuuseqarnissamut pissutissaqalersinneraa uannut nalunaarutigeqqullugu.

SULIAP INGERLASIMANERATA ALLAASERINEQARNERA

2017

Meeqqap angajoqqaavi atuarfiup 13. oktober 2017-i-mi ataatsimeeqatigai, meeqqap atuanngitsoortarnera pillugu.

Meeqqap ukiumi atuarfiusumi 2017-2018-imi atuanngitsoortarsimanera meeqqap atuarfiata pisortaata kommunimut e-mailikkut 8. november 2017-imeersukkut nalunaarutigaa. Nalunaarutiginninnermit 3. november 2017-imi ullulernerqarsimasumit makku erserput:

“[Meeraq] uani atuarfiusumi piffissap affaa sinnerlugu atuanngimmat inunnik isumaginnittoqarfimmut nalunaarutigaarput. Atualernermit ullut atuarfiusussat 56-init ullut 24 atuarfiginngilai. Atuannginnerit assigiinngitsunik peqquteqartinneqarput. Kisianni nakorsamit allagartamik takusaqannginnata nalunaarut manna ingerlatipparput.

Eqqaasinnaavarput aamma 1.-3. klassimi atuarnermini peqanngikulasarmat.

[...]”

E-mailimit suliassaqarfiup iluaneersumit erserpoq Meeqqanut Ilaqutariinnullu Immikkoortortaqarfimmi suliamik suliarinnittoq pifissami erseqqinnerusumik taaneqarsimanngitsumi atuarfiup pisortaanut saaffiginnissimasoq. Saaffiginnissummi ilaatigut oqaatigineqarsimavoq ilaqutariit isumasioqatigineqarnissaat pissusissamisoortoq kiisalu suliamik suliarinnittup, anaanaasup ataataasullu 2. januar 2018-imi ataatsimiinnissaat pilersaarutigineqartoq. Ataatsimiinneq taanna pillugu imaqarniliaq suliama allagaatini ilaangilaq.

2018

Meeqqap atuanngitsoortarnera meeqqap ilinniartitsisuata kommunimut 2. februar 2018-imi nalunaarutigaa, meeqqallu eqqarsartaatsikkut peqqissusia ernummatigigini oqaatigalugu.

Kommunip anaanaasullu 6. marts 2018-imi ataatsimiissimanerat pillugu suliama allattukkamit 8. november 2019-imi suliarineqarsimasumit makku erserput:

“[Anaanaasoq] innersuunneqarnikuusimavoq Ilaqutariit Kiffartuussivianni oqaloqatigineqartarnissaanik, [-mi] ilaqutariittut katsorsartereernermi (familiebehandling) kingorna [...-miit] tikikkami takkutinngisaannarsimavoq. [...]”

Meeqqap atuanngitsoortarnera pillugu anaanaasup 30. august 2018-imi ataatsimeeqatigineqarsimanera atuarfiup kommunimut 4. september 2018-imi ilisimatitsissutigaa. Atuarfiup ilaatigut makku oqaatigai:

“[...]”

[Atuarfimmit isumaginninnermi oqartussaasunut nalunaruteqartarsimagaluarpugut, taamatuttaarlu anaanaasoq arlalippassuariarluta saaffigisarsimagaluarlugu oqaloqatigisarsimagaluarlugulu, ajoraluartumilli kinguneqanngitsumik.] (Ombudsmandeqarfimmi nutsigaavoq)

Ukioq atuarfiusoq nutaaq aallarnerfigalugu ilinniartitsisortaarnikumata suliniutit nu-taat aallartippavut, [meeraq atuaqqilersinniarlugu].

Sisamangormat ataatsimiinnermi malunnartumik arnaa ikiorneqarnissaminik pisariaqartitsilluinnarpoq. Nammineerluni inunnik isumaginnittoqarfimmut saffiginnissimagaluarpoq, kinguneqanngitsumilli.

Isumaqaatigiippugut [meeraq] ullumi sisamangornermi 24/09-2018 atuarfimmut pu-laassasoq, pulaarneranilu atuariatoqqittalernissaa qanoq aaqqissussaneripput isumaqatigiissasugut aammalu AKT-mut innersuunniarlugu (oqaasinnguisinnaalernissaa anguniarlugu. Eqqarsaatit misigissutsillu oqaasinngortissinnaarpiarpasinnimmagit).

Meeqqalli atuartaleqqinnissaa angussagutsigu arnaata ikorfartorneqarnissaa pisariaqarpoq. Angst aamma depressioneqarpoq, taamaattumillu tarnip pissusaanik ilisimasalimmik oqaloqateqarnissani pisariaqartillugu.

Qanoq allatigut ikiorneqarsinnaanera aamma eqqarsaatigineqartariaqarpassip-pooq, soorlu immaq “hjemme-hosser” imaluunniit allatigut?

[Anaanap nukissaqarniarnikkut sanngiitsup meeqqami atuarnera eqqarsaatigalugu i-kiorneqarnissamik pisariaqartitsisup pineqarnera ersaripooq, neriuppugullu ilaqutariit piaartumik ikiornialersinnaagisi, taamaalilluni meeqqap atuarnini inatsisikkut piumasa-

rineqartutut ingerlateqqissinnaalerniassammagu.” (Ombudsmandeqarfimmi nutsigaavoq)]

Meeqqap ikiorneqarnissaa siunertaralugu paasissutissanik isertuussassanik ingerlatitseqqilluni napparsimmaviup, kommunip atuarfiullu akornanni tunniussisoqarsinnaaneranik akuersinermut uppernarsaat anaanaasup 12. september 2018-imi atsiorpaa. Akuersinermut uppernarsaat taanna piffissami 12.09.2018-imit 20.06.2019-imut atuuppoq.

Atuarfiup pisortaata meeraq kommunimut 24. september 2018-imi nalunaarutigeqqippaa. Nalunaarutiginninnermi immersukkami oqaatigineqarpoq meeraq atuarnermik nuannarinnileqqinnissaanut ikiorniarlugu nalunaarutiginnittoqartoq. Atuarfiup pisortaata kommunimut e-mailimi nalunaarutip kakkiunneqarfigisimaasani oqaatigaa pilertortumik ikiuisoqarnissaa neriuutigigini.

Anaanaasoq nalunaarutiginninneq 24. september 2018-imeersoq tunngavigalugu kommunimi ataatsimiinnissamut 27. september 2018-imi aggeqquneqarpoq. Ataatsimiinneq 5. oktober 2018-imi pisussaavoq.

Suliami allagaatini ilaavoq allakkiaq 8. oktober 2018-imeersoq assammik allanneqarsimasoq arfinilinnik quppernilik. Allakkiaq taanna paasisinnaasimangilara.

Atuarfiup meeraq 2018-imi oktoberip ulluisa ilaanni erseqqinnerusumik taaneqanngitsumi MISI-mut innersuuppaa.

Kommunimi suliamik suliarinnittoq MISI-mut e-mailikkut 8. oktober 2018-imeersukkut saaffiginnippoq, makkulu oqaatigalugit:

“Matumuuna qulaani niviarsiaaraq pillugu tusarniaaffigilaarpassi ilissinnut aamma suliamik ingerlatitsoqarsimanera pillugu qanoq sulinneqarneris? Imalt. qanoq suleqatigiissutigissaneripput meeqqap atualeqqissinnaanera atuarfimmu nuannarinnileqqissinnaanera ujartorlugu atuarfik saaffiginnissuteqarnera pillugu. [Anaanaasoq] aatsaannuaq ilissinnut attaveqarniarlunga tusarniaallunga imalt. suleqatissarsiorlunga attaveqassallunga ilisimatippara.

Paasivara aamma [meeraq] børnepsykiaterimut innersuunneqareersimasoq nakorsamit, arnaata oqarneratut.

[...]"

Meeqqap Qeqqata Kommuniani MISI-mut innersuunneqarsimanera utaqqisullu allattorsimaffiannut inissinneqarsimanera tarnip pissusaanik ilisimasallit pisortaata 13. november 2018-imi uppersarpaa.

Suliami allattuiffimmi allatamit 7. december 2018-imeersumit erserpoq anaanaasoq ataatsimiinnermut isumaqatigiissutaasumut takkussimangitsoq.

Suliami allattuiffimmi allatamit 13. december 2018-imeersumit erserpoq anaanaasoq kommunimik ataatsimiinnermut kingullermut takkussimangitsoq. Suliami allattuiffimmi allatami taamatuttaaq oqaatigineqarpoq anaanaasoq 13. december 2018-imi ataatsimiinnermut takussimangitsoq, napparsimalluni aggersinnaannginnini nalunaarutiginiarlugu puigorsimagamiuk.

2019

Suliffiup iluinnaani allakkiamit MISI-mi tarnip pissusiinik ilisimasalimmit suliarineqarsimasumit erserpoq tarnip pissusiinik ilisimasalik siunnersuisutullu ilinniartitsisoq 21. januar 2019-imi ataatsimiissimasut, meeqqap atuarumanginnera pillugu. Ataatsimiinnermi tassani isumaqatigissutigineqarpoq tarnip pissusiinik ilisimasallip anaanaasoq attaveqarfigissagaa, meeqqallu atuarnerata aallarteqqinneqarnissaa siunertaralugu siunnersuiniarluni ataatsimiinnissaq isumaqatigiissutigissagaa.

Suliami allagaatinit erserpoq tarnip pissusiinik ilisimasallip anaanaasoq 24. januar 2019-imi aamma 31. januar 2019-imi ataatsimeeqatigisimagaa, meeqqap atuarumanginnera atualeqqinnissamullu periarfissaa pillugit.

Suliffiup iluinnaani atugassatut allakkianit tarnip pissusiinik ilisimasalimmit suliarineqarsimasunit erserpoq anaanaasoq 13. maj 2019-imit 18. november 2019-

imut ingerlaavartumik attaveqarfigisarsimagaa, piffissamilu tassani anaanaasoq meerarlu oqaloqatigisarsimagai, angerlarsimaffiannullu pulaartarsimagai.

Tarnip pissusiinik ilisimasallip suliffiup iluinnaani atugassatut allakkiamini 14. juni 2019-imeersumi oqaatigaa suliamik suliarinnittoq atuarfimmi ataatsimiinnissaq pillugu attaveqarfigisimagini, ataatsimiinnerlu piviusunngortinneqarniarpat suliamik suliarinnittup tarnip pissusiinik ilisimasalik attaveqarfigissagaa. Suliamik suliarinnittup tarnip pissusiinik ilisimasalik 18. juni 2019-imi attaveqarfigaa, nalunaarfigalugulu atuarfimmi ataatsimiinnissaq taamaatinneqarsimasoq. Ullup ataatsimiiffissap nutaap aalajangerneqarnissaa suliamik suliarinnittup kissaatigaa. Suliamik suliarinnittumit attaveqarfigineqanngisaannarsimalluni tarnip pissusiinik ilisimasalik 2. september 2019-imi allassimavoq.

Anaanaasup allagai 25. juni 2019-imeersut tiguneqartut kommuni 14. august 2019-imi allassimavoq. Suliap 2017-imi august/septemberimit 2018-imi oktober/novemberimut ingerlasimaneranik qanoq paasinninnini anaanaasup allakkanit taakkunani nassuiarpaa. Anaanaasup allakkat qulequtaanni oqaatigaa allakkat suliamik suliarinnittup qinnutigisaatut suliap ingerlasimaneranik naalisaanertut nassiukkini. Allakkanit taakkunanga ilaatigut makku erserput:

“[...]”

Tarnip pissusiinik ilisimasallip Ilaqutariinnermut Immikkoortortaqarfik meeqqap qanoq ineriartorneranik 13. september 2019-imi nalunaarfigaa. Tarnip pissusiinik ilisimasallip nalunaarutiginninnermini ilaatigut makku oqaatigai:

“[...]”

[Meeraq] piffissami kingullermi ima kinguariarsimatigaaq MISI-p ammasumik siunnersuineramik ilitersuinermillu neqeroorutaani pineqartunut ilaatinneqarsinnaajunnaarsimalluni. [Meeraq] atuarfimmi ukiuni marlunni atuarsimannngilaq.

[...]

Sakkortuumik nikallungarujussuartartutut ersisartutullu takussutissartaqarpoq, pitsaanerulissappallu sukumiisumik katsorsarneqarnissaa pisariaqarpoq. Massakulli killiffimmini siunnersuisarneq ilitsersuisarnerlu februarimi aallartitara pissarsivigisinaanngilaa.

Taamaattumik nalunaarutiginnippunga, Ilaqutariinnermut Immikkoortorta qarfiup [meeraq] tarrarsorfigisinnaasaminik nuannaartorisinnaasaminillu ikiortilerneqarnissanut innersuussinnaassagaa neriuutigalugu. Ikiortip taassuma [meeraq] ilaqtutaminik qaniginerpaasaminik inooqateqaleqqissinnaanissanut ikiorsinnaavaa. [Meeraq] ikiortilerneqassasoq/tapersersortitut ikiortilerneqassasoq Ilaqutariinnermut Immikkoortorta qarfik aalajangerpat inuup taassuma arnaanissaa, ajornangippat 20-kkuni ukiulik, [meeqqallu] tarrarsorfigisinnaasarissagaa pingaartuuvoq. Ilaqutariinnermut Immikkoortorta qarfiup [meeraq] tapsersersortitut ikiortilerpagu taanna piareersaataasumik arlaleriarlunga oqaloqatigisarsinnaavara, suliarmi annertuumik ilisimasaqarfigigakku.” (Ombudsmandeqarfimmi nutsigaavoq)

Kommunip anaanaasoq nalunaarutiginninneq 13. september 2019-imeersoq tungavigalugu oqaloqatigineqarnissanut 25. september 2019-imi aggeqquaa. Ataatsimiinneq 7. oktober 2019-imi pisussaasimavoq. Aggeqqusissummi ilaatigut makku oqaatigineqarput:

“[...]

Aggersarneqarnerpit/-si peqqutaa ornigukku it annertunerusumik nassuiaatigineqassaaq aammalu qanoq ikiorserneqarnissannik kissaateqarner sutit tusarniutigineqassalluni.

[...]”

Qeqqata Kommuniata paasissutissanik nakorsamit/napparsimmavimmit, atuarfimmit, ulluunerani paaqqinniffimmit, Ilaqutariinnik Sullissivimmit kiisalu MISI-mit pissarsiniarsinnaanera akueralugu uppernarsaat anaanaasup 7. oktober 2019-imi atsiorpaa.

Qeqqata Komuniata paasissutissanik nakorsamit/napparsimmavimmit, atuarfimmit, Ilaqutariinnik Sullissivimmit kiisalu MISI-mit pissarsiniarsinnaanera akueralugu uppersarsaat alla anaanaasup 23. oktober 2019-imi atsiorpaa.

Suliamik suliarinnittup Ilaqutariinnik Sullissivik, MISI (PPR), atuarfimmi siunnersorti kiisalu tarnip pissusiinik ilisimasalik paasissutissanik anaanaasumut aamma meeqqamut tunngasunik 23. oktober 2019-imi qinnuigai. Tarnip pissusiinik ilisimasallip paasissutissat anaanaasumut meeqqamullu tunngasut suliamik suliarinnittumut ulloq taanna nassiuppai. Meeqqap ineriartornera pillugu atuarfiup oqaaseqaataa kommunip 28. oktober 2019-imi tiguaa.

Suliami allattuiffimmi allatamit 24. oktober 2019-imeersumit erserpoq kommunip anaanaasoq nalunaarutiginninneq 13. september 2019-imeersoq pillugu oqalotigisimagaa. Suliami allattuiffimmi allatamit tassannga ilaatigut makku erserput:

“[...]

[Anaanaasup] nalunngilaa [tarnip pissusiinik ilisimasalik] bekymringskrivelsemik nas-siussisimasoq, neriuuteqarporlu massakkut ikiorneqassallutik.

[...]

Tusaasinnaasakka aallaavigalugit anaanaq pisariaqartitsivoq panimmi tungaatigut ikiorneqarnissaminik, taamaammat suliniutigisariaqarpoq ikiorneqarnissaannut aammalu [meeqqap] atuartaleqqinnissaa inunnullu akulerunnissaa siunertaralugu. Sumiginnarneqarsinnaanngilarmi [meeraq] atuartussatitaammat inatsisit malillugit.

[...]”

Sulisuma ilaata anaanaasoq oqarasuaatikkut 21. november 2019-imi ilitsersorpaa, tassanilu panimmi ikiorneqarnissaa eqqarsaatigalugu kommunimut ajornartorsiutigisani anaanaasup sulisunnut paasissutissiissutigai. Sulisuma anaanaasoq allagaatinik paasitinneqarumalluni qinnuteqarsinnaanermut periarfissaqarnera-

nik ilisimatippaa, Ombudsmandimullu naammagittaalliornissamut periarfissaqarneranik paasissutissillugu.

Suliami allattuiffimmi kommunip ataataasullu oqaloqatigiinnerat pillugu allatamit 28. november 2019-imeersumit makku erserput:

“[Ataataasoq] maanga saaffiginnippoq panini [...] pillugu. Tassani meeraqarfini oqaloqatigigamiuk paasisimavaa panini imminut kilersitersimasoq, anaanaasorlu assut ilungersortoq, oqaloqatigigamiullu assut qiasoq, allaat oqaluttuarsimalluni anaanaasoq saaffiginnittaraluarlunigooq ikiorneqanngitsoq, aammalu taanna eqqarsaatigalugu qanoq iliortoqartariaqartoq, immaqagooq aatsaat panitsik imminut toquppat susoqassasoq.

[...].”

Suliami allattuiffimmi allatamit 28. november 2019-imeersumit aamma erserpoq suliamik suliarinnittup suliaq sukumiisumik misissoreerlugu anaanaasoq ataataasorlu 5. december 2019-imi ataatsimeeqatiginiarlugit isumaqatigiissuteqarfigisimagai.

Kommunip, anaanaasup ataataasullu 28. november 2019-imi ataatsimiissimanagerat pillugu suliami allattuiffimmi allatamit 6. februar 2020-mi suliarineqarsimsumit makku erserput:

“[Meeqqap] angajoqqaavi isumaqatigiinnikuuneq aallaavigalugu marluutillugit oqaloqatigineqarput, tassanilu oqaloqatigiinnermi annertunerusumik angajoqqaat tusarniaavigineqarput, qanoq imminnut ikioqatigiissinnaanersut, panitsik pillugu, aammalu suna atorfissaqartinneraat paniannut tunngatillugu. Oqaloqatigiinneq aallartimmat qanoq innersut aperineqarput, oqariartuutigivaalu anaanaasup assut ilungersorluni, aammalu ikiortissaaleqaluni, [...]

[...]

Oqaloqatigiinnerup ingerlanerani isumaqatigiippugut skolekonsulent [atuarfimmi] peqatigalugu angerlarsimaffimmi atuartinneqarsinnaanera ujartuiffigissavara. Aammalu angerlarsimaffianut alakkarlugu. Handleplan kingusinnerusukkut suliarinissaa eqqar-

saatigineqarumaarpoq. Akulikitsumik angerlarsimaffimmut alakkartarnissaat [meeqqap] tatiginnilernissa sulissutigineqassaaq. Killiffissiuineq sapaatit akunneri pingasut qaangiuppata angajoqqaat paasianaavigineqassapput [meeraq] qanoq ingerlanersoq.”

Meeqqap imminut toqunnissamik eqqarsaateqartarnera imminullu ajoquserniartutut pissusilersortarnera nunap immikkoortuani nakorsap kommunimut 26. november 2019-imi nalunaarutigaa. Nalunaarutiginninnermit tassanga ilaatigut makku oqaatigineqarput:

“[...]

Ernummaqateqarluni taamatut allattoqarpoq, [meeqqammi] inissisimanagera ataatigut atsiortup ernummatigisorujussuummagu, tassami [meeraq] imminut toqunnissaminik arlaleriarluni eqqarsaateqartarsimammat, massakkullu atuarfimmi ukiut marluk sinerlugit atuarsimanani.

[...]

[Meeraq] meeqqat tarningsa pissusaannik ilisimasalimmit PPR-imiittumit misissorneqarsimavoq, inuillu akornanniinnissamik ersigisaqartutut nikallungarujussuartartutullu paasineqarsimalluni, kommunillu tapersersortitut/attaveqataasartutut ikiortiliinermigut ikiorsiinissaa utaqqillugu.” (Ombudsmandeqarfimmi nutsigaavoq)

Suliami allattuiffimmi allatamit 6. december 2019-imi ataatsimiissimanager pillugu 6. februar 2020-mi suliarineqarsimasumit erserpoq suliamik suliarinnittup anaanaasoq taassuma angerlarsimaffiani oqaloqatigisalersimagaa. Suliami allattuiffimmi allatamit tassanga erserpoq oqaloqatigiinneq tulleg 17. december 2019-imi pissasoq.

2020

Meeqqat tarningsa pissusaannik ilisimasallip kommuni meeraq pillugu 10. januar 2020-mi nalunaarfigaa. Nalunaarutiginninnermit tassanga ilaatigut makku erserput:

“[...] [Meeqqap] atugarliortutut nanertisimasutullu ilisarnaatinik takussutissartaqarne-
ra meeqqanut inuusuttunullu tarnikkut napparsimasunut immikkoortorta qarfiup toq-
qissisimananngitsorujussuartut isigaa. Tamanna ima sakkortutigaaq piffissap sivikit-
sup ingerlanerani allatut ajornartumik iliuseqartoqartariaqarluni. [Meeqqap] siunis-
sami atugai ineriartorneralu pitsaanerulersinniarlugit [meeqqap]/ilaqutaasa taperser-
suinermik naleqquttumik, peqqissaataasumik piviusunullu naapertuuttumik neqe-
roorfigineqarnissaat pingaaruteqarluinnartutut isigineqarpoq.

[...]” (Ombudsmandeqarfimmi nutsigaavoq)

Suliami susassaqtut ulloq taanna ataatsimiissimanerat pillugu suliffiup iluani e-
mailimit 13. januar 2020-meersumit makku erserput:

“[...]

- **Tarnip pissusaanik ilisimasalik, MISI:** MISI [meeqqap] paasinnissinnaassutsik-
kut misissorneqarnissaanut periarfissaqarnerisooq paasiniaassaaq, taanna paasiniaallu-
ni misissuinerami ilanngunneqarsinnaaniassammat.
- **Atuarfimmi siunnersorti:** Ilinniartitsisup sorliup [meeqqamik] angerlarsimaffimmi
atuartitsinissamut periarfissaqarnera paasiniassavaa. Atuarfimmik oqaaseqaateq-
qusissut meeqqanut inuusuttunullu tarnikkut napparsimasunut immikkoortorta qarfiup
atuarfimmi sinnersortimut aammattaaq nassiutissavaa, taassumalu susassaqtumut
eqqortumut nassiunneqarnissaa atuarfimmi siunnersortip qulakkiissavaa.
- **Suliamik suliarinnittoq:** Anaanaasooq suliamik suliarinnittup suli oqaloqatigisassa-
vaa. Suliamik suliarinnittup [meeraq] tapersersortitut/attaveqataasutut ikiortilerne-
qarsinnaanersooq suliami susassaqtut tullianik ataatsimiinnginneranni aammattaaq
misissussavaa.
- **Meeqqanut inuusuttunullu tarnikkut napparsimasunut immikkoortorta qar-
fimmi tarnip pissusaanik ilisimasalik:** [Meeraq] immikkut ilisimasallip [maaniinne-
ranut] atatillugu [...-mi] misissorneqassaaq. Misissuinerup ingerlanera skype aqqu-
tugalugu aallarnerneqassaaq.” (Ombudsmandeqarfimmi nutsigaavoq)

E-mailimi 13. januar 2020-meersumi oqaatigineqarpoq suliami susassaqtut tul-
lianik ataatsimiinnerat 11. februar 2020-mi pissasooq.

Suliami allattuiffimmi allatami suliami susassaqtut 13. januar 2020-mi ataatsimiinnerat pillugu 7. februar 2020-mi suliarineqarsimasumi ilaatigut makku oqaatigineqarput:

“[...]”

Atuarfik ujartuissaaq ilinniartitsisumik, [meeqqap] tatigisinnaasaanik, ullunilu qaninerni paasinarsissaaq ingerlariaqqinnissaaq.

Psykologip [anaanaasoq] oqaloqatiginiarlugu isumaqatigivaa, tassanilu [meeqqap] inuunerani ukiuni siullerni inuunera qanoq ingerlasimanersoq paasiniaaffigissallugu.

[Atuarfimmi tarnip pissusiinik ilisimassalik] udredning pillugu ikiuussinnaanersoq aperineqarami ikiuussinnaalluni oqariartuutigivaa (påbegynde kognitiv undersøgelse).

Sullissisoq innarluutilinnut inatsit nutaaq malillugu paasiniaassaaq, [meeqqap] taper-sersorteqarsinnaaneranut tunngatillugu innarluutilinnik sullissisumut.

Malitseqartitsineq ingerlanneqassaaq 11. februar 2020. Nalunaaqutaq qulinut isumaqatigiissutaavoq.”

Suliami allagaatinit kingusinnerusukkumeersunit erserpoq 11. februar 2020-mi ataatsimiinnissaaq ingerlanneqarsimanngitsoq.

Suliami allattuiffimmi allatamit 7. februar 2020-mi suliarineqarsimasumit erserpoq anaanaasup 10. januar 2020-mi ataatsimeeqatigineqarnissaa kommunip pilersaarutigigaa. Ataatsimiinnissaaq taanna suliamik suliarinnittup taamaatippaa, makkulu suliami allattuiffimmi allanneqarput:

“Ullumikkut oqaloqatigisussaagaluarakku, oqaloqatigiinnissaaq kinguartinneqarpoq, alamik pinartumik suliaqarneq peqqutigalugu, inuttaalu sianerfigalugu paasitinneqarpoq.”

Suliami allattuiffimmi allatamit 17. januar 2020-mi ataatsimiinneq pillugu 13. februar 2020-mi suliarineqartumit erserpoq suliamik suliarinnittup anaanaasoq

angerlarsimaffianut pulaarsimagaa. Suliami allattuiffimmi allatamit erserpoq tulianik 7. februar 2020-mi naapeqqittoqassasoq.

Suliami allattuiffimmi allatamit allamit 7. februar 2020-mi naapeqqinneq pillugu 13. februar 2020-mi suliarineqartumit erserpoq naapinnissaq 14. februar 2020-mut nuunneqarsimasoq, anaanaasormi napparsimammat, takkussinnaanani lu nalunaarsimammat. Suliami allattuiffimmi allatami oqaatigineqarpoq ataatsimiinnissaq 14. februar 2020-mut nunneqarsimasoq.

Meeqqat tarningsa pissusiinik ilisimasallip kommuni meeraq pillugu 11. februar 2020-mi nalunaarfigaa. Nalunaarutiginninnermit tassannga ilaatigut makku erserput:

“[...]”

[Meeqqap] atugarissaarnera, ineriartornera atuarneralu iluatsissinnaassaappata ikiorserneqarnissamik tapersorsorneqarnermillu anaanaasup pisariaqartitsilluinnarnini takutippaa. [Meeraq]/ilaqutai eqqarsaatigalugit ernummateqarnera sakkortunerpaamik oqaatigisariaqarpara, inissisimaneramma ajorluinnarmat attanneqarsinnaananilu. [...] (Ombudsmandeqarfimmi nutsigaavoq)

Suliami allattuiffimmi allatanit erserpoq anaanaasup kommuni 14. februar 2020-mi ataatsimeeqatigisussaasimagaa, taamaattumillu suliamik suliarinnittoq anaanaasumut ornigussimasoq. Ataatsimiittoqarsimanngilarli, tassami anaanaasooq angerlarsimasimanngimmat.

Allakkiamit MISI-mi tarnip pissusiinik ilisimasalimmit 15. november 2020-mi suliarineqarsimasumit qulaani allaaserineqartutut erserpoq kommunip anaanaasooq ulloq taanna nalunaarutiginninneq tunngavigalugu 11. februar 2020-mi attaveqarfigisimagaa, angerlarsimaffimmut pulaarsinnaaneq oqaloqatigiissutiginiarlugu. Aammattaaq erserpoq kommunip anaanaasooq 18. februar 2020-mi attaveqarfigeqqissimagaa, angerlarsimaffimmut pulaartoqarsinnaanersoq paasiniarlugu.

Anaanaasoq kommunimut e-mailikkut 14. april 2020-mi saaffiginnippoq, ilaatigullu makku oqaatigalugit:

“[...]

[Suliamik suliarinnittoq atiatigut taasaq] ilissinni suliva?

[...] uatsinnut pulaartaraluarpoq, tutsiunnanili, qaammatillu marluk missaanni takkusimanani, [suliamik sularinnittoq atiatigut taasaq] SANA-mi tarnip nakorsaaneersoq taamani napparsimmavimmi (13. januar 2020-mi) tarnip pissusiinik ilisimasallip suliniaqatigiit aallarnigai peqatigalugit ataatsimiikkattali [suliamik suliarinnittoq] aamma ataatsimiinnermut kingullermut aamma takkutinngilaq, taamaattumillu nutaamik sul-lissisortaaqqissanersugut taamaappallu qaqugu tamanna pissanersoq paasiniaavunga.

Tarnip pissusiinik ilisimasalik suliaq uatsinnut tunngasoq pillugu ilissinnut aamma allannikuuvoq, suliarli massakkut ingerlanneqarunangilaq, tassami suliap qanoq ingerlanera pillugu tusagaqanngisaannaratta. Qulaani taaneqartumit akissummik perusuppunga, SANA-mimi tarnip pissusiinik ilisimasalik oqaloqatigigakku, ilissinnillu akissummik aamma utaqqimmat.” (Ombudsmandeqarfimmi nutsigaavoq)

Kommunip e-mailimut 14. april 2020-meersumut akissuteqarnissaa anaanaasup 20. april 2020-mi nukingisaarutigaa.

Suliami allattuiffimmi allatanit marlunnit immikkoortunit tulleriinneri malillugit 27. april 2020-mi aamma 26. juni 2020-mi suliarineqarsimasunit 24. april 2020-mi ataatsimiissimaneq pillugu ilaatigut makku erserput:

“[Anaanaasup] panini ilungersuutigaa ikiorneqarnissaa, pania sakkortuumik socialangsteqarpoq depressioneqarlunilu, taakkulu tunngavigalugit maannakkut ukiuni pingasunngortuni atuarani.

[Anaanaasup] eqqartungaatsiarpai maani sullinneqarniartarsimanerigaluani iluatsinneq ajortut, taamaattumik uanga nutaamik sulerusissamik aallartitserusullunga marluulluta pania ikiorniarlugu suleqatiginissaanik neqeroorfigaara, tigulluarpaalu. [...]

[...]

Ilaatigut makku iliuusissatut maanngaanniit takorloorpagut:

Støtteperson, tassani pinerullugu [meeraq] ulluinnarni inuunermut "nalinginnaasumut" utertikkiartuaarlugu tapersersortissaa, maanna arnaata ulloq unnuarlu paarsaraa. [Meeraq] sinittarfimminiit aniumaneq ajorpoq qatanngutiniluunniit iluamik ilagisanagit, taamaammat pingaaruteqarpoq inummik tatigilersinnaasaminik peqatigerujoorsinnaasaminillu tapersersorteqaleruni, tassuuna anguniarlugu [meeqqap] anisinaalernissaa.

Hjemmeskole: [Meeraq] nappaatini sakkortuumik atorneri peqcutigalugit anisinaaneq ajorpoq taamalu atuariartornissaminut nukissaqassanani, naak atuarnini nuannarigaluarlugu, ilaatigut arnaalu eqqartorparput aamma atuarfimmi klassimini skypekkut malinnaasinnaagaluartoq, nammineq nuisanngikkaluarluni, kisianni klassimi pissutsit malinaavigisinnaallugit, taamaalillunilu neriunartumik immaqa takujartuaarsinnaagaluarlugu atuarfimmiinneq aamma ajunngitsoq ersinanngitsorlu, taanna anguniarlugu atuarfimmi klassimi ilinniartitsisua atuarfianilu ningioq netværksmødeqatigineqarsinnaasutut takorloorpakka.

[Anaanaasorlu] aamma isumaqatigiippugut hjemmebesøg aallartissallugu, tassani [meeraq] siullertut naapinngikkaluarlugu arnaalu oqaloqatigeerujoortassaagut, piomaguni [meeraq] tusarnaarsinnaavoq nuinngikkaluarluni, taamaasillunilu aamma tatinginassuseq takuleriaruniuk neriunartumik angusinnaajumaaripput taamaalluni ilagalugu oqaloqatigeerujoorsinnaanissarput.

[...]"

Meeqqap kigutiminik piffissami sivilisunerusumi misissortittarsimannginnera kigutigissaaviup kommunimut 14. maj 2020-mi nalunaarutigaa. Nalunaarutiginninnermi immersukkami oqaatigineqarpoq meeraq ersisarnini pissutigalugu 2017-imi junimili kigutiminik misissortissimanngitsoq.

Suliami allattuiffimmi allatanit 22. juni 2020-meersumit erserpoq:

"[...]"

Pania [...] pillugu handicapomráðemi paasiniaavunga socialangst depressionilu sak-kortuumik atugarimmagit taakkunani ikiorsiissutit pitsaanerusut anguneqarsinnaam-mata.

[...] handicappimi afd. leder siunnersuivoq sullissisua oqaloqatigissagiga isumaqataal-lunilu meeraq handicappimi sullinneqalissasoq ikiorsiissutit eqqortut tunniunneqas-sammata.

[...]"

Suliami allattuiffimmi 2. juli 2020-mi ataatsimiinneq pillugu 3. juli 2020-mi allan-neqarsimasumit makku erserput:

"Ippassaq sisamangornermi Meeqqanut Inuusuttuaqqanullu Immikkoortortaqarfimmi underretningsteamimi sullissisoq [...] peqatigalugu [anaanaasoq] isersimasorivarput. [...]

Ukiut marluk sinnerlugit atuannigilaq, arnaata kissaatigisarsimagaluarpaa [Meeqqap] angerlarsimaffimmi atuartarnissaa, massakkumut angusaqarfiunngitsumik. Kommuni-miit neqeroorutigisinnaavarput inuttut tapersersorteqarnissaa. [Meeraq] anisaleqqis-sappat ulluinnaalu nalinginnaasumik ingerlaleqqinnissaanut inuttut tapersersorti naammangilaq. Immikkut ilisimasalimmik pisariaqarpoq sullinneqarnissaa.

Arnaa tamaviaarpoq panini ikiorusukkaluarlugu, kiisalu qanoq iliornissaminik sakkus-saaleqisarluni.

Niviarsiaaraq annertuumik ikiugassaavog, tassunga tunngatillugu qanoq ikioqatigiissin-naavugut?

[...]"

Innarluutilinnut immikkoortortaqarfimmi suliamik suliarinnittup napparsimma-vimmut 2. juli 2020-mi ataatsimiinneq pillugu e-mailianit 8. juli 2020-meersumit ilaatigut makku erserput:

"[...]

Ukiut marluk sinnerlugit atuangilaq, arnaata kissaatigisarsimagaluarpa [meeqqap] angerlarsimaffimmi atuartarnissaa, massakkumut angusaqarfiunngitsumik.

Kommunimiit neqeroorutigisinnaavarput inuttut tapersersorteqarnissaa. [Meeraq] anisaleqqissappat ulluinnaalu nalinginnaasumik ingerlaleqqinnissaanut inuttut tapersersorti naammanngilaq. Immikkut ilisimasalimmik pisariaqarpoq sullinneqarnissaa.

[Anaanaasoq] tamaviaarpoq panini ikioorusukkaluarlugu, kiisalu qanoq iliornissaminik sakkussaaleqisarluni.

[Meeraq] annertuumik ikiugassaavoq, tassunga tunngatillugu qanoq ikioqatigiissinnaavugut?"

Qeqqata Kommuniata paasissutissanik MISI-mit pissarsiniarsinnaanera akueralugu uppersaat anaanaasup 2. juli 2020-mi atsiorpaa.

Meeraq pillugu oqaaseqaat suliamik suliarinnittup 15. juli 2020-mi suliaraa. Immersugassami atornerqartumi meeqqanik tapersersuisarneq pillugu inatsimmi kapitalit 7-imit 9-mut innersuussutigineqarput.

Suliami allattuiffimmi allatami 28. oktober 2020-meersumi 11. august 2020-mi ataatsimiinneq tunngavigalugu suliarineqarsimasumit erserpoq nakorsap oqaaseqaataa kommunip tigusimagaa, tassanngalu ersertoq meeqqap nappaataa suususerneqarsimanngitsoq. Suliami allattuiffimmi allatami tassani oqaatigineqarpoq suliaq Meeqqanut Inuusuttunullu Immikkoortortaqarfimmut ingerlateqqillugu nassiunneqarsimasoq.

MISI anaanaasup angerlarsimaffianut 16. september 2020-mi aamma 15. oktober 2020-mi pulaarsimavoq.

Suliamik suliarinnittup anaanaasoq 9. november 2020-mi ataatsimeeqatigaa.

Suliami allagaatini ilaavoq MISI-mi tarnip pissusaanik ilisimasallip allakkiaa 15. november 2020-meersoq. Allakkiami tassani oqaatigineqarpoq misissuineq a-

tuarfiup 2018-imi oktoberimi inassuteqaateqarneratigut suliarineqarsimasoq. Tarnip pissusiinik misissuinermi paasisat allakkiami tassani allaaserineqarput.

Suliffiup iluani e-mailimit erserpoq suliami susassaqtut 23. november 2020-mi ataatsimiinnissaat pilersaarutigineqartoq, tassungalu anaanaasoq, MISI, atuarfik kommunilu peqataaqqullugit qaaqquneqarsimasut.

Suliami allattuiffimmi allatamit 26. november 2020-meersumit makku erserput:

“[Meeraq] pillugu ataatsimiittoqarnerani MISI-mi meeqqat psykologiat, MISI-mi psykologi, anaanaasoq, atuarfimmi ilinniartitsisoq kommunillu sagsbehandleria peqatigiilutik [meeraq] pillugu eqqartuipput.

Pineqartoq MISI-miit pulaarneqarsimavoq annikitsumik oqaloqatigineqarsimavoq, pineqartoq inuiaqatigiinnut appakaateqqinnissaanut ikaarsaartinniarneqarnissaa anguniarlugu MISI-mi sullissisut telefonikkut skypekkullu attaviginnittalissapput 2 minutinik taallugu oqaloqatigineqartalissaaq, kiisalu atuarfimmiit atuakkanik tunniussisogartalerluni. Arnaasullu atuakkanik atorniartarfimmut atuarsinnaasaanik misilittaaffigalugu aallartisarluni. Tapersersorteqalernissaanut arnaasoq qinnuteqaateqarnissamut allakkatigut qinnuteqassaaq kommunimut. Pineqartoq innarluutilittut nalunaarsorneqarsinnaanngilaq takussutissaqanngimmat, matoqqaneratali ammarsarnejarnissaa akuunerulernissaanik suliniuteqartoqarnissaa arnaata suleqataaffiginiarsarissagaa, kiisalu arnaasoq immikkut oqaloqateqartalernissaanut psykologimut innersuunneqarluni.”

Meeqqat Inuusuttullu Tarnikkut Nakorsaannit MISI-mut atuarfimmullu e-mailimit 14. december 2020-meersumit ilaatigut makku erserput:

“[Meerarmi] pillugu suliami susassaqtut ataatsimiinnermi oqaloqatigiissutigaarput [meeraq] marlussoriarlugu oqaloqatigisareerukku paasisutississagissi. [...]

[...]

Ataatsimoorlutami oqaloqatigiissutigisussaavarput qaqugukkat ilinniagassinneqartalernissaa kiisalu sunik ilinniagassinneqartarnissaa/suliasinneqartarnissaa pissusissamisuussanersoq.

Isumaqarpunga atuarfimmi suliassanik ukiortaamit tunisalerutsigu [meeqqamut] pitsaasuussasoq. Ajornanngippat atuarfiup januarip aallartisimalernerani aallarteqqin-neranut atatillugu.

Isumaqarpunga kia suliassanik tunniussisuusarnissaa oqaloqatigiissutigutsigu pitsaassagaluartoq, tassanilu pissusissamisuussaaq atuarfik ilinniartitsisumik tassunga atuartisiartornissamut periarfissaqarnerseq paasissallugu. Atuarfimmi tamanna oqaloqatigiissutigereerpisiuk?

Kia qanorlu akulikitsigisumik orniguttarnissaa oqaloqatigiissutigisariaqarparput. Qanoq isumaqarpisi?

Suliami susassaqtut ataatsimiinnitsinni isumaqatigiissutigaarput [suliamik suliarinnittup atiatigut taasap] [suliamik sularinnittoq atiatigut taasap alla] aperissagaa MISI-p kommuni tapersiiniutit pillugit allaffigisinnaaneraa.

Atuarfimmut isumaqatigiissutigineqarpoq [meeqqap] angerlarsimaffimmi atuartitsisulernerqarnissaa atuartitsisorluunniit angerlarsimaffimmukarluni suliassanik tunniusiartortarnissaa atuarfiup pisortaqatigiivnut misilillugu apeqqutigineqassasoq." (Ombudsmandeqarfimmi nutsigaavoq)

MISI-p suliamik suliarinnittunut arlalinnut atuarfimmullu 16. december 2020-mi e-mailianit ilaatigut makku erseerput:

"[...]

MISI tapersersortitut ikiortimik qinnuteqaammut kaammaattuummik allalluarsinnaavoq, qinnuteqaalli nammineq kommunimi Atugarissaarnermut Immikkoortortaqarfimmeertussaavoq, anaanaasoq isumasioqatigalugu, taamaattumillu e-mailip assilinera [suliamik suliarinnittumut] nassiuppara. Katsorsaaneq pillugu ataatsimiinnermi isumaqatigiissutigaarput qinnuteqaat [suliamik suliarinnittup] ingerlateqqissagaa. Anaanaasoq tamanna pillugu tusagaqarsimanngilaq. [...]

Atuartsineq eqqarsaatigalugu aamma tusarusogaarput [atuarfik] sunik periarfissaateqarnerseq. Angerlarsimaffimmi atuartsineq pisinnaanngippat siunissami immikkut atuartsisoqarnissaa qinnuteqaatigineqassanersaq isumaliutersuutigineqarsinnaavoq.

Taamaaliornikkut nalunaaquttap akunneri [meeqqap] atuartinneqarneranut atorneqartussat aalajangersarneqarsinnaapput.” (Ombudsmandeqarfimmi nutsigaavoq)

2021

MISI-p katsorsaaneq pillugu 23. november 2020-mi ataatsimiinneq pillugu allakkiaa 4. januar 2021-meersoq suliamik allagaatinut ilaavoq. Tassani oqaatigineqarpoq meeqqap angerlarsimaffimmi atuartinneqarnissaanut periarfissaq oqaloqatigiissutigineqarsimasoq kiisalu periarfissat atuarfimmi siunnersortip misissoriarai. Allakkiamit tassannga ilaatigut makku erserput:

“[...] MISI tapersersortitut ikiortimik qinnuteqaammuk kaammattuummik allalluarsinnaavoq, qinnuteqaalli nammineq anaanaasumit kommunimi Atugarissaarnermut Immikkoortortaqqarfik suleqatigalugu ilusilersorneqartussaavoq. Taamaalilluni MISI-p allakkanik taamaattunik ujartuisoqarnissaa utaqqimaarpaa.

Siunissami angerlarsimaffimmi atuartitsineq/immikkut atuartitsineq pillugu [atuarfimmit] amerlanerusunik paasissutissiisoqarnissaa kiisalu Atugarissaarnermut Immikkoortortaqqarfimmit angerlarsimaffimmi tapersersuineq pillugu paasissutissiisoqarnissaa MISI-p massakkut utaqqimaarpaa.” (Ombudsmandeqarfimmi nutsigaavoq)

Anaanaasup tapersersortitut ikiortitut atorfinitsinneqarnissamik qinnuteqaat 26. januar 2021-mi nassiuppaa, tassanilu ilaatigut imatut allalluni:

“Matumuuna innersuunneqarnera aallaavigalugu paninnut støttepersoniuunissannut støttepersonitullu akissarsiaqqartinneqarnissara qinnutigaaara.

Ukiuni pingasunngortuni kingullerni atuarumajunnaartalerneraniit atuannigiffeqarnikuunera peqqutigalugu saaffiginnissutigisarput ullumikkut tikillugu suliaq sulii ingerlaavoq. Paasitinneqarnikuunngilanga sulii qanoq paniga ikiorneqarsinnaanersoq kiisalu støttepersonilerneqarsinnaanerluta.

[...]”

Anaanaasup qinnuteqaataata 26. januar 2021-meersup tiguneqarnera kommunip suliami allattuiffimmi 2. februar 2021-mi allassimavaa.

Anaanaasoq uannut 5. februar 2021-mi naammagittaalliorpoq, makkulu oqaatigalugit:

“Paniga ullumikkut 12-inik ukioqartoq atuarfimmi ukiuni pingasuni atuarsimanngilaq, [tarnillu pissusiinik ilisimasallip] MISI-mi/PPR-imi sulisimasup oqaatigaa inuit akornanniinnissani ersigigaa nikallungarujussuartartuusorlu. Taanna kommunimut nalunaa-rutiginnilluni aamma allakkaluarpoq panimmalu tapersersorteqarnissaa qinnuteqaatigalugu, atuarfimmi aallarteqqissinnaanissaa neriuutigalugu.

2017-imi saaffiginnikkamali ullumikkumut kommunimit ikiorneqanngilagut, suliamillu suliarinnittup kingulliup 2020-mi novemberimi pisimagunakkata [...-mik] ateqartup kingornatigut aggeqquneqarnikuunata. Taanna naapippara tarnip pissusiinik ilisimasalimmik [...-mik] SANA-mi tarnikkut napparsimasunut immikkoortortaqarfimmit angalatitaasoq peqqinnissaqarfiup uatsinnut innersuussaa oqaloqatigigakku. Tassami kommunimit ikiorneqannginnatta [panigalu] ajortikkiartuinnarmat.

[...]” (Ombudsmandeqarfimmi nutsigaavoq)

Anaanaasoq kommunimut 18. februar 2021-mi saaffiginnippoq, qinnuteqaatimi 26. januar 2021-meersup qaqugu aalajangiivigineqarnissaa naatsorsuutigisinnanenerini paasiniarlugu.

Kommuni suliami allagaatinik nassiusseqqullugu 23. februar 2021-mi qinnuigaa-ra, makku oqaatigalugit:

“[...]

Saaffiginnissut imatut paasivara [anaanaasup] panimmi [...-p] ikiorserneqarnissaanik tapersersorneqarnissaanillu 2017-imi qinnuteqaatiminik Qeqqata Kommuniata (matuma kingornatigut kommunimik taaneqartartussap) suli aalajangiiviginnissimannginnera naammagittaalliuutiginiaraa.

Aammattaaq imatut paasivara [anaanaasoq] suliap ingerlanerani suliap killiffianik ilisimatinneqartarsimanngitsoq sulialluunniit inaarlugu suliarineqarnissaa qaqugu naatsorsuutigisinnaaneraa paasitinneqarsimanngitsoq.

Oqaatigaara siusinnerusukkut oqaatigisarsimagiga suliani aalajangersimasuni piffissaq suliamik suliarinninnermut atorneqartoq innuttaasup naatsorsuutigisinnaasaanit sivi-sunerusumik kinguaattoorfiuppat oqartussaasup suliap ingerlanerani innuttaasumut qaammatit pingasukkaarlugit ilisimatitsisarnera ingerlatsinermi ileqqorissaarnermut naapertuunnerpaassasoq.

Oqaaseqaatiga 2019-4 2019-imi ukiumoortumik nalunaarutinni ilanngunneqartoq tamarmiullunilu nittartakkanni www.ombudsmandi.gl-imi atuarneqarsinnaasoq inner-suussutigaa.

./ [Anaanaasup] e-mailiata 5. februar 2021-meersup assilnera ilanngullugu nassiuppara.

1. Suliaq Qeqqata Kommunianut ingerlateqqillugu nassiuppara, kommuni qinnuigalugu suliami pilertornerpaamik aalajangeeqqullugu, imaluunniit kommuni piffissap sivikinnerusup ingerlanerani aalajangiisinnaanngippat suliap killiffia [anaanaasumut] nas-suiaqqullugu akissutisinnanilu qaqugu naatsorsuutigisinnaagaa paasiteqqullugu.

2. [Anaanaasup] saaffiginnissutaa misissuineramik aallartitsinissamut pissutissaqalersitsinersoq naliliinissannut suli tunngavissaqanngilanga.

Taamaattumik kommuni qinnuigaara suliami allagaatit tamaasa taakku ingerlatsivimmi immikkoortortaqarfimmiluunniit sorlermiinnerat apeqqutaatinnagu uannut e-mailikkut [...-mut] nassiateqqullugit.

Suliami allagaatinik tamanik oqarnermi pineqarput allagaatit suliap [anaanaasumut] aamma [meeqqamut] tunngasup suliarineqarneranut atatillugu tiguneqarsimasut pilersinneqarsimasullu, matumani allakkat nassiunneqartut tiguneqartullu, allattukat/allakkiat, nalunaarutiginninnerit nalinginnaasumillu allattukkat.”

Suliami allattuiffimmi allatamit 25. februar 2021-meersumit allamit una erserpoq:

“[Anaanaasup] panimmi atuarfimmuut ikaarsaariartinnissaanut tapersersortitut qinnuteqarnermut suliaq aallartinniarlugu netværksmøde aggersaasoqarnissaa pissasoq siullertut aallartitsissutigalugu iliuusissatut pilersaarut suliarineqassaaq. Atuarfimmuut

ikaarsaariartinneqarnissaanut arnaasoq anaatut suleqataanissamik kaammattuineq pisinnaanersoq aperineqassaaq.”

Suliami allagaatit kommunimit 22. marts 2021-mi tiguakka. Kommunip allagaa-
taani ilaapput allakkat 17. marts 2021-meersut, taakkunanngalu makku erser-
put:

“[Anaanaasup] panini [...] eqqarsaatigalugu suliap ingerlanera pillugu naammagittaal-
liuutaanut atatillugu [anaanaasoq] Qeqqata Kommuniani Atugarissaarnermut Immik-
koortorta qarfiup attaveqarfigisimavaa, 11.03-2021-milu oqaloqatigisimallugu.

Oqaatigisinnaavarput suliaq arriitsumik ingerlasimammat, peqqinnissaqarfillu katsor-
saanissaq pillugu ataatsimeeqatigineqarsimavoq, tassanilu paasineqarluni [meeqqap]
nappaataa naatsorsuutigineqaraluartut suussusilerneqarsimanngitsoq, suliarlu pine-
qartup atuarnera angerlarsimaffimmillu tapersersuineq eqqarsaatigalugit nutaamik
naliliiffigineqassasoq.

[Anaanaasumit] massakkut paasitinneqarpugut atuarnera pillugu pilersaarutit mee-
qat atuarfiannit aallartinneqarsimasut, sapaatit akunnerannut ataasiarluni angerlarsi-
maffimmi atuartinneqartassalluni. Tapersersortitulli ikiortiliisoqarnissaa suli qinnute-
qaatigineqarsimanngilaq, [anaanaasorli] nammineq panimminut tapersersortitut ikior-
tinngorumalluni qinnuteqaateqarsimavoq, qinnuteqaataali suli akineqarsimanani. Ta-
manna pineqartup ersisarnini nikallungarujussuartarninilu pissutigalugit tapersersor-
titut ikiortaasinnaasimanginneranik tunngavilersorneqarsimavoq.

Ataatigut atsiortup [anaanaasoq] tamanna tunngavigalugu isumaqatigiissuteqarfigi-
simavaa tarsersortitut ikiortimik avataaneersumik qinnuteqaateqartitsisoqassasoq,
kiisalu ataani atsiortunga suliami susassaqtut atuarfiup, MISI-p, peqqinnissaqarfiup
atugarissaarnermullu immikkoortoqartaqarfiup peqataaffigisaannik 17. marts 2021-mi
nal. 13.30 ataatsimiinneranni peqataassasunga.

[...]” (Ombudsmandeqarfimmi nutsigaavoq)

Suliami allattuiffimmi allatamit 17. marts 2021-meersumit makku suliami susas-
saqtut ataatsimiinnerat pillugu erserput:

“Tapersersortitut ikiortitut qinnuteqaatigineqartup suliareqqinneqarnera [anaanaasumut] isumaqatigiissuteqarfigereerlugu [anaanaasoq] peqatigalugu suliame sussaqaartut ataatsimiinneranni peqataavunga, tassanilu MISI atuarfillu peqataasinnaanatik nalunaarsimapput.

Tarnikkut nappaatinik katsorsaavimmit oqaatigineqarpoq [meeqqap] nappaataa suusulerneqarsinnaanngitsoq, oqaloqatigisinnaannginnamikkumi, atuarneralu eqqarsaatigalugu kommuni qanoq iliorniarnersoq ujartorpaat, massakkut angerlarsimaffimmi sap. ak. ataasiarluni atuartinneqartarpoq, ilinniartitsisorli suli naapissimanagu.

[Anaanaasoq] oqarpoq [panini] ammariartoqqilersoq, angajuni marluk namminerisaminnik inigisaminnut nuunnerisa kingornatigut, [meerarlu] inimeeqataasaleqqissimavoq igaffimmilu nereqataasalersimalluni. Biileqataasarsimavoq, biilimiilli anisarsimani.

Ilaqutariinnik Sullissivimmut innersuussut tapersersortitullu ikiortiliisoqarnissaanik qinnuteqaat suliarelugit aallartippugut, naliliisoqarpoq anaanaasoq panimminut tapersersortitut sap. akunneranut nal. ak. 40-ni ikiortinngorpat pitsaassagaluartoq, [meerarmi] tapersersortitut ikiortini ilisarisisamasarinngikkuniuk matoqqittussaammat.

[Anaanaasup] nassuiaatitut aamma oqaatigaa [panimmi] isarussani aserorsimagai, ilinniakkerisinnaassagunilu assut atorfissaqartillugit, taamaattumillu [anaanaasup] sap. ak. ataasiarluni asaasartutut sulisalersimalluni, [meerarli] tamatuma kingornatigut ajornerulersimalluni.

Isumaqatigiissutigineqarpoq [anaanaasoq] 22. marts 2021-mi nal. 13.00 takkutissa-soq, ilaqutariinnik sullissivimmut innersuussinermi immersugassaq immersorsinnaaniassagatsigu, [meerarlu] eqqarsaatigalugu aamma oqaloqateqarsinnaaniassammat.”
(Ombudsmandeqarfimmi nutsigaavoq)

Suliami allattuiffimmi allatamit 22. marts 2021-meersumit erserpoq suliamik suliarinittup anaanaasoq ilaqutariinnik sullissivimmut innersuussinermi immersugassap immersorneqarnera kiisalu tapersersuineq pillugit oqaloqatigisimagaa.

Suliami allagaatini ilaavoq ilaqutariinnik sullissivimmut innersuussinermi immersugassaq immersorneqarsimasoq, anaanaasumit 22. marts 2021-mi atsiorneqar-

simasoq. Innersuussinermi immersugassap ilaa tassaavoq immikkoortoq iliuusissanut pilersaarutitut taaneqartoq, makkulu tassannga erserput:

“[...]

Ilaqutariit Ilaqutariinnik Sullissivimmi katsorsarneqarnissamik kissaataat piomassuseqarnerallu:

Ilaqutariit sutigut allangortitsisoqarnissaa kissaatigaat
[Meeqqap] pitsaanerulernissaa, inuit amerlasuut akornanniissinnaalernissaa, atuarfimmuut uteqqinnissaa ukioqatiminillu peqateqartaleqqinnissaa [anaanaasup] kissaatigaa. [Meeraq] eqqarsaatigalugu siunnersuineq ilitsersuinerlu [anaanaasup] ammaffigai.
Ilaqutariit sutigut piomassuseqarpat:
[Anaanaasoq] ulluinnarni inuunermik nalinginnaasumik ingerlalernissaanut sakkusannik piomavoq, arlaannillu siunnersuisinnaasunik ilitsersuisinnaasunillu oqaloqateqarnissani pisariaqartillugu.

Iliuusissanut pilersaarut

Piffissami sivikinnerusumi

Piffissami sivisunerusumi

Meeqqamut 1-imut	Meeqqamut 1-imut
[Meeqqap] ammanerulernissaa allanillu oqaloqateqarsinnaalernissaa siunertaralugu	[Meeqqap] atuarfimmuut uternissaa, ammanerulernissaa avatangiisiminillu akuliukkiartuaalernissaa siunertaralugu
Meeqqamut 2-mut	Meeqqamut 2-mut
Meeqqamut 3-mut	Meeqqamut 3-mut
Meeqqamut 4-mut	Meeqqamut 4-mut
Angajoqqaanut/isumassortinut/inersimasunut	Angajoqqaanut/isumassortinut/inersimasunut
[Meeraq] qanoq iliorluni ammanerulersisinnaaneraa atuarfimmullu utertissinnaanera siunnersuutininik ilitsersuinermillu [anaanaasup] tiguisinnaalersinneqarnissaa. [Anaanaasoq] oqaloqatissaminik amigateqarpoq.	

Pisumi iliuusissatut siunnersuutit:

Ilaqutariinnik Sullissiviup neqeroorutai suut naleqquttuusinnaappat
--

[Anaanaasup] panini peqatigalugu ulluinnarni inuunermik ingerlatsisinnaalersinialugu ikiorneqarnera tapersorsorneqarneralu, immaqalu miljømedarbejderilerneqarnera. Kiisalu [anaanaasumik] oqaloqateqarnerit. Oqaloqatissaqartitsinerlu.
--

Ulloq naliliiffik:

22.04.2021

[...] (Ombudsmandeqarfimmi nutsigaavoq)

Anaanaasoq panimminut sapaatit akunnerannut nalunaaquttap akunnerini 40-ni piffissami 6. april 2021-mit 1. juli 2021-mut tapersersortitut ikiortitut 30. marts 2021-mi atorfinitsinneqarpoq. Piffissaq taanna kingusinnerusukkut 6. juli 2021-mut sivitsorneqarpoq. Aalajangiinermi 30. marts 2021-meersumi oqaatigineqarpoq suliaq piffissap akuersissuteqarfiusup naanerani naliliiffigineqarumaartoq, meeqqap killiffigilersimasaa aallaavigalugu.

Kommuni 2. november 2021-mi qinnuigaara suliaq pillugu oqaaseqaateqaqqullugu kiisalu suliami allagaatit amerlanerusut nassiateqqullugit, makkulu ilaatigut oqaatigalugit:

“[...]”

1. Kommuni qinnuigaara suliaq pillugu oqaaseqaateqaqqullugu.

Kommuni qinnuigaara oqaaseqaammi apeqqutit uku pillugit, ajornanngippat matumani tulleriinnilerneqarneri malillugit, immikkut nassuaateqaqqullugu:

- a) Suliap [meeqqamut] tapersersortitut ikiorsiisoqarnissaa pillugu suliami allagaatinik 22. marts 2021-mi nassiussisoqarnerata kingornatigut massakkut killiffia. /. Allakkakka 23. februar 2021-meersut, assilinerat ilanngulugu nassiussara, inner-suussutigaakka, taakkunanilu kommuni qinnuigaara suliami pilertornerpaamik aalajangeeqqullugu, imaluunniit kommuni piffissap sivikinnerusup ingerlanerani aalajangiisinnaanngippat kommuni [anaanaasumut] suliap killiffia pillugu nassuaateqaqqullugu qaqugulu akissuteqartoqarnissaa naatsorsuutigisinnaagaa paasissutissiissutigeqqullugu.

- b) Kommuni tapersersortitut ikiorti pillugu aalajangiisimangippat qinnuigaara suliaq sumut killinnersoq uannut paasisutissiissutigeqqullugu.
- c) Kommuni tapersersortitut ikiorti pillugu aalajangiisimangippat kommuni qinnuigaara [anaanaasoq] suliap killiffia piffissarlu suliamik suliarinninnermut ator-neqartussatut naatsorsuutigineqartoq pillugit ilisimatinneqarsimangersoq paasisutissiissutigeqqullugu. [Anaanaasoq] ilisimatinneqarsimangippat kommuni qinnuigaara tamanna sooq pisimanginnersoq nassuiaqqullugu.
- d) Tapersersortitut ikiortiliisoqarnissaanik qinnuteqaat kommunip inatsit suna tungavigalugu suliaraa, aamma sooq inatsit taanna, inatsisit allat pinnagit, toqqar-neqarsimava. (Isumaginninneq pillugu inatsit imaluunniit meeqqat atuarfiat pillugu inatsit)

2. Suliami allagaatinit erserpoq suliami nalunaarutiginninnerit isumakuluuteqarnerlu pillugit allakkat arlallit kommunip tigusimagai. Nalunaarutiginninnerit isumakuluuteqarluniluunniit allakkat tiguneqartut ataasiakkaarlugit taakku tiguneqarnerisa kingornatigut kommuni qanoq iliuuseqartarsimangersoq paasiuminaatsippara. Taamaattumik kommuni qinnuigaara nalunaarutiginninnerit isumakuluuteqarlunilu allakkat ataani taaneqartut tiguneqarnerisa kingornatigut kommuni qanoq iliuuseqartarsimangersoq nassuiaqqullugu, ajornangippat matumani tulleriinnilerneqarneri malillugit:

- a) [Meeqqap] atuanngitsoortarnera pillugu [atuarfiup pisortaanit], 3. november 2017-imeersoq
- b) [Meeqqap] atuanngitsoortarnera pillugu [atuarfiup pisortaanit], 24. september 2018-imeersoq
- c) [Meeqqap] atuarumanginnera siunnersortilerneqarsinnaaneranullu/tapersersortitullu ikiortilerneqarsinnaaneranut periarfissaq pillugit tarnip pissusiinik ilisimasalimmit [...-mit], 13. september 2019-imeersoq.
- d) [Meeqqap] atuarumanginnera, imminornissamik eqqarsaatai imminullu ajoqsertarnermik pissusilersornera pillugit nunap immikkoortuani nakorsamit [...-mit], 25. november 2019-imeersoq.
- e) [Meeqqap] atuarumanginnera, imminornissamik eqqarsaatai, imminut ajoqsertarnermik pissusilersornera ersisarneralu pillugit ungdomspsykiatrisk psykologimit [...-mit], 10. januar 2020-meersoq.
- f) [Meeqqap] ersisarnini pissutigalugu ukiorpassuannortuni kigutiminik misissortittarsimanginnera pillugu [...-mit], 14. maj 2020-meersoq.

3. Suliami allagaatit atuareerlugit takusinnaavara suliami allagaatit arlallit kommunip pigisariaqagai amigaataasut. Taamaattumik kommuni qinnuigaara allagaatit uku uannut nassiuteqqullugit:

[...]

Kommuni naggasiutitut qinnuigaara suliami allagaatinik allanik uanga suli tigusimanngisannik peqarnerseq misissoqqullugu. Suliami allagaatinik allanik taamaattunik peqarpat kommuni qinnuigaara taakku oqaaseqaammut ilanngullugit uannut nassiuteqqullugit.

[...]”

Oqaaseqaat allagaatillu amerlanerusut kommunimit 2. december 2021-mi, 6. december 2021-mi, 7. december 2021-mi kiisalu 15. december 2021-mi tiguakka.

Kommunip uannut oqaaseqaataanit 30. november 2021-mi ullulerneqarsimasumit makku erserput:

“[...]

1 a) [Meeqqap] tapersersortitut ikiortilerneqarnissaanik qinnuteqaat pillugu suliap killiffia tassaavoq taanna 30. marts 2021-mi akuersissutigineqarsimasoq, 30.11.2021-p tungaanut sap. akunneranut nal. ak. 40-nik. anaanaasoq tapersersortitut ikiortitut atorfinitsinneqarpoq, suliarlu 30. november 2021-mi naliliiffigeqqinneqarumaarluni. [Anaanaasoq] suliami ingerlaavartumik ilisimatinneqartarpoq, ilaqutariinnik sullissivimmi oqaloqatigiittarnissanut [anaanaasullu] oqaloqatigineqartarnissanut inner-suussut suliarineqarsimavoq, oqaloqatigiittarnerit taakku massakut ingerlapput.

1 d) Tapersersorneqarnissamik qinnuteqaat akuerineqarsimavoq, meeqqat tapersersorneqarnissaannut Inatsisartut inatsisaanni nr. 20-mi, 26. juni 2017-imeersumi § 22 aamma 25 tunngavigalugit.

2 a) Nalunaarutiginninnerit ernummateqarlunilu allakkat eqqarsaatigalugit suliami inummut tunngasumi takuneqarsinnaavoq nalunaarutiginninneq 3. novemberimi tigu-neqarsimasoq, allattuiffimili takuneqarsinnaalluni nalunaarutiginninnerup tigu-neqarnera qanorluunniit iliortoqarsimanagera allanneqarsimanngitsut.

2 b) [Anaanaasoq] taassuma kissaatigisaatut ilaqtariit katsorsarneqarnissaat siunertaralugu ilaqtariinnik sullissivimmut innersuussineq pillugu oqaloqatigineqarnissaminut 24. sept. 2019-imi aggeqqullugu qinnuigineqarsimavoq, takkussimanngisaannarlunili. Paasissutissanik [anaanaasoq] akuersitillugu atuarfimmit, peqqinnissaqarfimmit MISI-millu pissarsiniartoqarsimavoq.

2 c) Tassanngaanniit isumaqatigiissutigineqarpoq angerlarsimaffimmi atuartitsinermut periarfissat misissorneqassasut, MISI-llu [anaanaasoq] oqaloqatigiumallugu aggeqqullugu arlaleriarluni qinnuigisarsimagaluarpa, taannali ataasiaannarluni takkussimalluni. Aamma isumaqatigiissutigineqarpoq tarnip pissusiinik ilisimasalik [...] saapatit akunneri pingasut qaangiuppata angerlarsimaffimmut pulaassasoq naliliissasorlu.

2 d) Nakorsap ernummateqarluni allagai aallaavigalugit kommuni iliuuseqarsimanersoq takusinnaangilara, suliami allattuiffimmi allattuisoqarsimanngimmat.

2 e) [Meeqqat tarningisa pissusiinik ilisimasallip] ernummateqarluni allannerata kingornatigut [anaanaasoq] oqaloqatigineqarnissaanut aggeqqullugu qinnuigineqarpoq, oqaloqatigiinnissarli kinguartinneqarluni.

2 f) Kigutileriffimmit nalunaarutiginninneq eqqarsaatigalugu allattuisoqarsimanngilaq, [meerarli] ineeqqami avataanut attaveqarfeqanngilaq, ersisarnini nikallungarujussuarninilu pissutigalugit.

Immikkoortoq 3, nr. 10 eqqarsaatigalugu suliami MISI-mi meeqqat tarnikkut nakorsaannut innersuussummik takusaqarsinnaangilagut. Nr. 11. Ataatsimiinnissamut aggeqqusissut 27. oktober 2018-imeersoq, aggeqqusisoqarsimanersoq oqaloqatigiittoqarsimanersorluuniit takusinnaangilarput.” (Ombudsmandeqarfimmi nutsigavoq)

2022

Kommuni 11. aamma 14. februar 2022-mi qinnuigaara ilassutaasumik oqaaseqaateqaqqullugu. Ilaatigut makku oqaatigaakka:

“[...]

1. Suliami allagaatinit kommunip uannut nassiusaanit erserpoq [anaanaasoq] [meeq-qap] tapersersortitut ikiortaatus 30. november 2021-p tungaanut atorfeqartitaasimasooq.

Kommuni qinnuigaara suliap 30. november 2021-p kingornatigut killiffia pillugu ilassutitut oqaaseqaammi nassuiaateqaqqullugu.

2. Suliami allagaatit kommunip uannut nassiusai tunngavigalugit malugaara kommuni nalunaarutiginninnerit uanga allakkanni 2. november 2021-meersuni taagukkam saniatigut [...-mi] meeqqat tarnikkut pissusiinik ilisimasalimmit nalunaarutiginninnermik 11. februar 2020-mi aamma tigusaqarsimasooq.

Kommuni qinnuigaara nalunaarutiginninnermut tassunga atatillugu qanoq iliuseqarsimanerluni ilassutaasumik oqaaseqaammi nassuiaqqullugu.

3. Oqaaseqaammi 30. november 2021-meersumi kommunip ilaatigut oqaatigaa [anaanaasoq] suliaq pillugu ingerlaavartumik ilisimatinneqartarsimasooq.

Kommunip [anaanaasoq] suliap killiffia imaluunniit kommunip aalajangiinissaanik qa-qugukkut naatsorsuutiginnissinnaanera pillugu oqaasiinnartigut allakkatigulluunniit ingerlaavartumik ilisimatittarsimaneraa suliami allagaatit tunngavigalugit takusinnaangilara.

[Anaanaasoq] suliamik suliarinnittunut arlalinnut attaveqarfiginnittarsimavoq. [Anaanaasup] uannut naammagittaalliummini oqaatigaa 2017-imit 5. februar 2021-mi naammagittaalliornermi tungaanut allakkanik aggeqqusissutinilluunniit kommunimit tigusaqartarsimanani, kiisalu suliamik suliarinnuttut allanngoraangata tamatumingna ilisimatinneqartarsimanani.

Kommuni tamanna tunngavigalugu qinnuigaara [anaanaasoq] suliap ingerlanerani aamma suliamik suliarinnittut allanngornerannik qanga qanorlu iliorluni ilisimatittarsimanerlugu ilassutaasumik oqaaseqaammi nassuiaateqaqqullugu.

4. Kommuni allakkanni 2. november 2021-meersuni (immikkoortumi 2 b-mi) qinnuigaara [meeqqap] atuangitsoortarnera pillugu [atuarfiup pisortaata] 24. september 2018-imi nalunaarutiginninnerata kingornatigut qanoq iliuseqarsimanerluni nassuiaqqullugu.

Kommunip oqaaseqaammi 30. november 2021-meersumi oqaatigaa [anaanaasoq] atuarfiup nalunaarutiginninnera tunngavigalugu oqaloqatigineqarnissaminut 24. september 2018-imi aggeqquneqarsimasoq.

Tamanna imatut paasivara kommunip [anaanaasoq] nalunaarutiginninneq kommunip ukiup siuliani tigusani tunngavigalugu oqaloqatigineqarnissaanut 24. september 2019-imi aggeqqusimagaa.

Kommuni qinnuigaara kommunip oqaaseqaataani 30. november 2021-meersumi immikkoortumik taassuminnga uanga paasinninnera eqqortuunersoq paasissutissiissuti-geqqullugu.

5. [Anaanaasup] [panimminut] tapersersortitut ikiortaanermut nalunaaquttap akunerinik atugassanik qinnuteqaataa pillugu kommunip aalajangiinerinit 30. marts 2021-meersumit aamma 24. august 2021-meersumit erserpoq kommuni pisuni taakkunani marlunni meeqqat tapersersorneqarnissaannut Inatsisartut inatsisaanni nr. 20-mi, 26. juni 2017-imeersuni (matuma kingornatigut meeqqanik tapersersuisarnek pillugu inatsimmik taaneqartartussami) § 25, imm. 4, nr. 4 tunngavigalugu aalajangiisarsimasoq.

Meeqqanik tapersersuisarnek pillugu inatsimmi § 25, imm. 2-kkut aalajangersarneqarpoq kommuni tapersersuilluni immikkut iliuuseqartoqarnissaanik aalajangiinnginnermini meeraq oqaloqatigeqqaarsimassagaa, tak. § 43, isumaginninnikkut misissuinermik ingerlatsisimassasoq, tak. § 45 aamma iliuusissanut pilersaarut suliarisimassagaa, tak. § 46.

Aalajangiinerit 30. marts 2021-meersooq aamma 24. august 2021-meersooq sioqqullugit [meeraq] oqaloqatigineqarsimasoq, isumaginninnikkut misissuinermik ingerlatsisoqarsimasoq iliuusissanullu pilersaarut suliarineqarsimasoq suliame allagaatini kommunip uannut nassiusaani takusinnaanngilara.

Kommuni qinnuigaara ilassutaasumik oqaaseqaammi tamanna pillugu nassuiaateqaq-qullugu.

[Meeraq] oqaloqatigineqarsimasoq, isumaginninnikkut misissuineq ingerlanneqarsimasoq iliuusissanullu pilersaarut suliarineqarsimasoq kommuni isumaqarpat kommuni

qinnuigaara suliami allagaatit taakku ilassutaasumik oqaaseqaammut ilanngullugit uannut nassiateqqullugit.

6. Qulaani oqaatigineqartutut kommunip aalajangiinerinit 30. marts 2021-meersumit aamma 24. august 2021-meersumit erserpoq aalajangiinerit meeqqanik tapersersuisarneq pillugu inatsimmi § 25, imm. 4, nr. 4 tunngavigalugu pisimasut.

Tamatumunnga atatillugu oqaatigaara meeqqanik tapersersuisarneq pillugu inatsimmi § 21, imm. 4, nr. 2-mi, tak. § 22, erseqqissumik aalajangersarneqartoq meeqqamut taassumaluunniit ilaqtanaanut tapersersortitut ikiortiliisoqarnissaata akuerineqarnissaanut periarfissaqartoq.

Oqaatigaarattaq kommunip oqaaseqaammi 30. november 2021-meersumi (immikkoortumi 1 d-mi) oqaatigigaa tapersersortitut ikiortiliisoqarnissaa meeqqanik tapersersuisarneq pillugu inatsimmi § 22, tak. § 25, tunngavigalugu akuersissutigineqarsimasoq.

Kiisalu oqaatigaara suliamik suliarinnittup meeqqanik tapersersuisarneq pillugu inatsimmi § 25, imm. 2 akissarsiat unitsinneqarnissaannut ingerlasimanerullu naliliivigineqarneranut inatsisikkut tunngavigisatut [anaanaasumut] e-mailikkut innersuusutigigaa.

Kommuni qinnuigaara ilassutaasumik oqaaseqaammi manna pillugu nassuiaateqaqqullugu, tassalu aalajangiinerni meeqqanik tapersersuisarneq pillugu inatsimmi § 21, imm. 4, nr. 2, tak. § 22 pinnagu § 25, imm. 4, nr. 4 soq taaneqarsimanersoq aamma meeqqanik tapersersuisarneq pillugu inatsimmi § 25, imm. 4, nr. 4-p kommunip aalajangiinerinut inatsisikkut tunngavittut eqqortuunera kommunip aalajangiusimaneraa.

7. Oqaatigaara atuarfik pillugu Inatsisartut inatsisaanni (matuma kingornatigut atuarfik pillugu inatsimmik taaneqartartussami) nr. 15-imi, 3. december 2021-meersumi § 43, imm. 1-imi oqaaseqatigiit siulliit kommunalbestyrelsimut pisussaaffiliisuummata meeqqat atuartitaasussaataasut tamarmik atuarfimmut allatsinnissaat imaluunniit atuarfimmil nalinginnaasumik piumasarisaasunut nallersuuttumik atuartitaanissaat isumagissallugu.

[Meeqqap] atuangitsoortarnera [atuarfiup pisortaata] kommunimut e-mailikkut 8. november 2017-imeersukkut siullermeerluni nalunaarutigaa.

Suliami allattuiffinnit ataatsimiinnerillu pillugit imaqarnilianit arlalinnit erserpoq angerlarsimaffimmi atuartitsisoqarnissaa oqaluuserineqarsimasoq. Oqaluuserinninnerilli taakku tigussaasutigut sunik kinguneqarsimanersut paasiuminaatsippara.

Kommuni qinnuigaara manna pillugu nassuiaateqaqqullugu, tassalu kommuni isumaqarnersoq [meeqqap] atuartussaaitaanerata attatiinnarneqarnissaa kommunip naam-mattumik qulakkeersimagaa, kiisalu kommuni qinnuigaara [meeqqap] atuarnerata massakkut killiffia uannut paasissutissiissutigeqqullugu.

8. [Meeqqap] innarluutaa takuneqarsinnaangimmat taanna innarluutilittut nalunaarsorneqarsinnaangitsoq kommunip suliami allattuiffimmi 26. november 2021-mi piler-sinneqarsimasumi innersuussutigaa.

Oqaatigaara innarluutilinnik nalunaarsuineq inuit innarluutilit tapersorsorneqarnissaannut Inatsisartut inatsisaanni nr. 13-imi, 12. juni 2019-imeersumi (matuma kingornatigut innarluutilit pillugit inatsimmik taaneqartartussami) taaguutit atorneqangitsoq. Taaguut taanna suliaasaqarfimmi tassani tassunga attuumassuteqartumik allatigut inatsiliornermi atorneqarnersoq ilisimangilara.

Kommuni tamanna tunngavigalugu qinnuigaara suliami allattuiffimmi 26. november 2021-meersumi innarluutilinnik nalunaarsuineq pillugu oqaatigineqartumi kommunip suna siunertarisimaneraa nassuiaqqullugu.

9. Kommuni aamma qinnuigaara [meeraq] innarluutilit pillugit inatsimmi malittarisassani pineqartunut immaq ilaatinneqarsinnaasoq suliap ingerlanerani sukkulluunniit naliliisoqarsimanersoq aamma nassuiaqqullugu.

[Meeraq] innarluutilit pillugit inatsimmi malittarisassani pineqartunut ilaatinneqarsinnaanersoq siusinnerusukkut naliliisoqarsimangippat kommuni qinnuigaara soq taamatut naliliisoqarsimanginnersoq ilassutaasumik oqaaseqammi nassuiaqqullugu.

Matumani oqaatigaara suliaq [meeqqamut] tunngasoq Innarluutilinnut Immikkoortortaqarfimmi suliarineqarsimasoq. [Meeqqap] innarluutilit pillugit inatsimmi malittarisassani pineqartunut ilanngunneqarnissaanut periarfissaqarnersoq naliliisoqarsimangippat kommuni qinnuigaara ilassutaasumik oqaaseqammi manna pillugu nalileeqqullugu, tassalu [meeraq] suliap ingerlanerani malittarisassani taakkunani pi-

neqartunut ilaatinneqarsinnaasimagaluanginnersoq kiisalu innarluutillit pillugit inat-simmi pineqartunut massakut ilaatinneqarsinnaanersog.

[...]"

Kommunip uannut oqaaseqaataa 9. marts 2022-mi tiguara, tassanngalu makku erserput:

"Qeqqata Kommuniata suliamik suliarinninnera pillugu apeqqutit arlallit akeqquneqarlutillu nassuiaqquneqarsimapput. Kommunip nassuiaataa matumuuna nassiunneqarpoq.

1. [Anaanaasog] [panimminut] tapersersortitut ikiortitut 30. november 2021-p tungaanut atorfeqarsimavoq. Qeqqata Kommuniata oqaatigisinnaavaa pineqartoq tapersersortitut ikiortitut suli atorfeqartoq, qaammatilli pingasut qaangiunneranni naliliisoqarnissaa toqqarneqarsimavoq, [meerarmi] inummik allamik sulisulerneqarsinnaanngimmat, matoqqasorujussuunera pissutigalugu, [anaanaasullu] saniatigut angerlarsimaffimmi avataani ilisarimanngisaminut toqqissisimanarinngisaminullu attaveqarumaneq ajormat.
2. Meeqqat tarnimikkut pissusiinik ilisimasallip [...-p] nalunarutiginninnera 11.02.-2020-meersog tiguneqartoq eqqarsaatigalugu isumaginninnermi suliamik suliarinnittup, MISI tarnip pissusiinik ilisimasallip, atuarfimmi siunnersortip aamma psykiatrisk ambulatoriami meeqqanut inuusuttunullu tunngasuni tarnip pissusiinik ilisimasallip susasaqartutut ataatsimeeqatigiinnissaat isumaqatigiissutigineqarpoq – ilanngusaq 2-tut ilanngunneqarpoq.
3. [Anaanaasog] pisunik oqarasuaatikkut ingerlaavartumik ilisimatinneqartarsimavoq, taakkuli suliami allattuiffimmi ajoraluartumik allanneqartarsimanngillat. [Anaanaasog] taamaallaat allakkatigut 2017-imi ilisimatinneqarsimavoq.
4. Atuarfiup pisortaata nalunaarutiginninnerata 24.09.2018-imi ullulerneqarsimasup tiguneqarnerata kingornatigut tamanna pappialanngorlugu allanneqarsimavoq, mappimullu suliami allagaatinik imalimmut ikineqarsimalluni. [Anaanaasog] oqaloqatigineqarnissaminut 5. oktober 2018-imi aggeqquneqarsimavoq. Allakkiat ilanngunneqarput. ILANNGUSSAQ 3.

5. [Meeraq] oqaloqatigineqarsimanngilaq, isumaginninnikkut misissuineramik ingerlat-
sisoqarsimanani kiisalu [meeqqamut] [anaanaasumullu] iliuusissanut pilersaarut
suliarineqarsimanani. Tamanna [meeqqap] ersisarnini/nikallungasarnini pissutigalugu
attaveqarfigineqarsinnaannginneranik pissuteqarpoq. Angajoqqaalli tamarmik
28. november 2019-imi oqaloqatigineqarsimapput.
6. [Meeraq] tapersersortitut ikiortilerneqarmat isumaqatigiissutigineqarpoq tamanna
qaammatit pingasukkaartuussasoq, [anaanaasumit] allaasumik atorfinitsitsisoqar-
sinnaanersoq takuniarlugu, [meerarli] allanut attaveqarsinnaanngimmat akuersis-
sut suli qaammatinik pingasunik sivitsoqqinneqarpoq. Taamani suliamik suliarin-
nittoq e-mailikkut allassimavoq akuersissut 18.08.2021-mi unitsinneqassasoq,
akuersissulli piffissamit 26.08.2021-mit 30.11.2021-mut sivitsorneqarpoq, piffis-
sallu akuersissuteqarfiusup naannginnerani [anaanaasoq] naliliiniarluni ataatsimee-
qatigineqartussaalluni. [Anaanaasoq] 26.08.2021-mi nal. 13.00 oqaloqatigineqar-
poq, tassanilu isumaqatigiissutigineqarluni iliuusissanut pilersaarut suliarineqassa-
soq, tamannali kinguartinneqarpoq [meeraq] sanngiippallaaqimmat, susassaqartul-
lu 09.09.2021-mi nal. 13.00 [anaanaasullu] ilaqutariinnik sullissiviup, atuarfiup, su-
liamik suliarinnittup peqataaffigisaannik ataatsimiissasut isumaqatigiissutigineqar-
luni. [Anaanaasoq] 09.09.2021 peqataasinnaanani nalunaarpoq, napparsimanani
pissutigalugu. Susassaqartulli [anaanaasoq] peqataatinnagu ataatsimiinnissaat aa-
lajangiunneqarpoq, aalajangertoqarlunilu ilaqutariinnik sullissivimmut innersuussi-
soqassasoq, [meeraq] terapeutimik tarnilluunniit pissusiinik ilisimasalimmik oqalo-
qateqartalerniassammat. Innersuussut tiguneqarpoq isumaqatigiissutigineqarluni-
lu ataatsimeeqqittoqassasoq. Isumaqatigiissutigineqarpoq ilaqutariit [anaanaasor-
lu] pillugit suleqatigiinneq tarnip pissusiinik ilisimasalik suleqatigalugu siunnersui-
soralugulu oqaloqatiginninnermik aallarteqqaassasoq. [Meerarli] oqaloqatigineqar-
tarnera aallartissinnaanngilaq, sulisussaqaannginneq pissutigalugu. Suliamik sulia-
rinnittoq meeqqanik tapersersuisarneq pillugu inatsimmi § 25, imm. 4 tunngaviga-
lugu isumaginninnikkut misissuineramik allaartitsisussatut isigineqarpoq, [meeraq]
ilaqutariillu pisariaqartitaat pitsaaneruseq nalliiivigisinnaajumallugit, imaanngit-
soq § 21, imm. 4, tassami [meeraq] inissinneqarnissaminut ulorianartorsiortuun-
ngimmat, namminerli angerlarsimaffimmini tapersersorneqarnissani pisariaqartillu-
gu.
7. Meeqqat atuarfiat eqqarsaatigalugu taamaallaat susassaqartut 23.08.2021-mi
ataatsimiinneranni ataatsimeeqatigineqarsimavoq, tassanilu atuarfiup [meeraq]
iPadiimik atuartitsinermilu atortussanik tunisussaasimavaa.

8. 26. november 2021-mi pineqartup ersinngitsumik innarluuteqarnera tunngavigalugu innarluutilittut nalunaarsorneqarnissaanik oqarnermi pineqarunarpoq innarluutilit pillugit inatsimmi pineqartunut ilaalersitsineq.
9. Atugarissaarnermut Immikkoortortaqarfik isumaqarpoq pineqartuq innarluutilit pillugit inatsimmi pineqartunut ilaalersinneqarsinnaanngitsoq, innarluutaami suussusersineqarsinnaanngimmat, attaveqarfiginiarnera ajornakusoortorujussuummat. Tamanna MISI-p misilissimavaa, taakkuugamimmi paasinnissinnaassuseqarneranik misiliisussat. Suliaq tamanna tunngavigalugu innarluutilinnut immikkoortortaqarfimmut tunniunneqarsimagaluarpoq, suliarli innarluutaata suussusilerneqarsinnaannginnera pissutigalugu meeqqanut ilaqutariinnullu immikkoortortaqarfimmut utertinneqarsimalluni.

[Meeraq] innarluutilit pillugit inatsimmi pineqartunut ilaalersinneqarsinnaasoq uppernarsarniarlugu innarluutaa suussusersineqarsimanngippat Atugarissaarnermut Immikkoortortaqarfiup [meeraq] malittarisassat tunngavigalugit innarluutilit pillugit inatsimmi pineqartunut ilaalersissinnaanngilaa. Ilanngussaq 1 takuuk.

[...]"

Namminersorlutik Oqartussat inunnik innarluutilinnik tapersersuisarneq pillugu nalunaarutaanni nr. 29-mi, 7. august 2020-meersumi § 1 ilanngussami 1-imi issuarneqarpoq.

Ilanngussani 2-miippoq e-maili suliami susassaqtut aalajangiinerat pillugu allakkiamik 13. januar 2020-meersumik siusinnerusukkut issuarneqartumik imalik.

Ilanngussami 3-miippoq allakkiaq assammik allataq, tassanilu anaanaasup oqarasuaataata normua allanneqarsimavoq, kiisalu allassimalluni anaanaasoq 5. oktober 2018-mi nal. 13:00 oqaloqatigineqarnissaminut aggeqquneqarsimasoq. Taamatuttaaq ilaapput quppernerit arfinillit assammik allatat 8. oktober 2010-meersut, taakkuli paasisinnaanngilakka.

Kommuni 9. juni 2022-mi qinnuigaara suliaq pillugu ilassutaasumik oqaaseqaa-teqaqqullugu. Ilaatigut makku oqaatigaakka:

“[...]

1. Uanga paasisara unaavoq [anaanaasup] [panimminut] tapersersortitut ikiortitut atorfinitsinneqarnissamik nammineq qinnuteqaateqarnissaminut periarfissamik kommunip ilitsersuisimannginnera [anaanaasup] uannut naammagittaalliummini ilaatigut naammagittaalliuutigigaa.

Pisortat ingerlatsineranni suliassat sularineqartarnerat pillugu Inatsisartut inatsisaanni nr. 8-mi, 13. juni 1994-imeersumi (matuma kingornatigut suliassat sularineqartarnerat pillugu inatsimmik taaneqartartussami) § 7, imm. 1-ikkut aalajangersarneqarpoq ingerlatsinermi oqartussaasup, matumani kommuni ilanngullugu eqqarsaatigalugu, inuit oqartussaaffigisamini suliassat pillugit apeqquteqarlutik saaffiginnittut pisariaqarneratut annertutigisumik ilitsersorlugillu ikiortassagai.

Suliassat sularineqartarnerat pillugu inatsimmi § 7, imm. 1 pillugu oqaaseqaatinik makku erseput:

“§ 7-imi aalajangersakkami erseqqissumik taaneqarpoq innuttaasunik ilitsersuisar-nissaq ingerlatsinermi oqartussaasunut tamanut nalinginnaasumik pisussaaffiusoq. Aalajangersagaq malillugu pisariaqartitsineq naapertorlugu ilitsersuisoqartartus-saavoq, suliap suunera pissusiusullu erseqqissut apeqqutaatillugit. Ilitsersuisoqar-sinnaavoq allaganngorlugu suliamik, soorlu ilitsersuummik naqitamik tamanut atortumik, oqartussaasunut saaffiginnittunut tamanut tunniunneqartartussamik imaluunniit ataasiakkaanut oqaasiinnartigut imaluunniit taakku tamaasa atorlugit. Ilitsersuinerup qularnaallisariaqarpaa innuttaasut paasitilluarneqarnissaat malittari-sassanik ingerlatsivimmi pineqartumi atorneqartunik aamma periaatsit oqartussaa-sunut saaffiginnittup malitassaasa suunerinik aamma innuttaasut paasissutissiisu-tigisassaasa suunerinik.

Oqartussaasuttaaq innuttaasoq imminut saaffiginnittoq pisariaqarneratut annertuti-gisumik ikiortariaqarpat, pisariaqarpat qinnuteqaatinik, nalunaarutininik assigisaa-nilluunniit immersuinissaanut.

[...]”

Suliami allagaatit aamma [anaanaasup] uannut naammagittaalliuutaa aallaavigalugit paasisara unaavoq [anaanaasup] kommuni ikiorserneqarnissamik tapersorneqarnissamillu arlaleriarluni qinnuigisarsimagaa, kiisalu kommunip [anaanaasooq] arlaleriarluni ataatsimeeqatigisarsimagaa.

Uanga paasinninnera unaavoq kommuni [anaanaasumik] ilitsersuinissaminut ukununga atatillugu periarfissaqarsimasooq:

- [Anaanaasup] akuersinermik uppersaalluni 12. september 2018-imi, 7. oktober 2019-imi kiisalu 2. juli 2020-mi atsiorneranut atatillugu,
- [anaanaasup] allakkatigut saaffiginnissutaanik 25. juni 2019-imeersumik kommunip tigusaqarneranut atatillugu,
- suliamik suliarinnittup 10. januar 2020-mi ataatsimiinnissamik taamaatitsineranut atatillugu,
- kommunip attaveqarfigisaqartakkanik 13. januar 2020-mi aamma 23. november 2020-mi ataatsimeeqateqarneranut atatillugu,
- kommunip [anaanaasumik] 17. januar 2020 aamma 11. februar 2020-mi ataatsimeeqateqarneranut atatillugu,
- kommunip e-mailimik 14. april 2020-meersumik [anaanaasumit] tigusaqarneranut atatillugu aamma
- kommunip [anaanaasumik] 24. april 2020-mi, 16. september 2020-mi, 5. oktober 2020-mi kiisalu 9. november 2020-mi ataatsimeeqateqarneranut atatillugu.

[Anaanaasup] [panimminut] tapersersortitut ikiortitut atorfinitsinneqarnissamik qinnuteqaateqarnissaminut periarfissaanik kommuni ullunut qulaani taaneqartunut atatillugu ilitsersuisimangitsoq takusinnaavara.

Kommuni qinnuigaara [anaanaasooq] panimminut tapersersortitut ikiortitut atorfinitsinneqarnissamik qinnuteqaateqarnissamut periarfissaanik ilitsersorsimanerlugu taamaappallu qanga taamaalorsimanerluni paasisutissiissutigeqqullugu.

Kommuni tamatumunnga atatillugu qinnuigaara manna pillugu nassuiaateqaqqullugu, tassalu kommunip paasinninnera unaanersoq kommuni suliasat suliarineqartarnerat pillugu inatsimmi § 7, imm. 1 tunngavigalugu ilitsersuisussaataanerminik eqqortit-sisimasooq.

2. Suliami allagaatit kommunip uannut nassiussai tunngavigalugit malugaara kommuni nalunaarutiginninnerit allakkanni 2. november 2021-meersuni aamma 14. februar 2022-meersuni taasama saniatigut [meeqqap] atuangitsoortarneranik [atuarfimmi ilinniartitsisup] nalunaarutiginninneranik allamik tigusaqarsimasoq. Ilinniartitsisup taassuma [meeqqap] eqqarsartaatsimigut peqqissusia pillugu ernummateqarnini aamma oqaatigaa.

Kommuni qinnuigaara nalunaarutiginninnermut tassunga atatillugu qanoq iliuuseqarsimanini uannut oqaaseqaammimi nassuiaqqullugu.

[...]"

Kommunip uannut oqaaseqaataa 8. juli 2022-mi tiguara, tassanngalu makku erseput:

"[...]

1. Qeqqata Kommuniani Atugarissaarnermut Immikkoortorta qarfiup oqaatigisinnavaa tapersersortitut ikiorti eqqarsaatigalugu aatsaat 30.03.2021-mi siunnersuisoqarlunilu ilitsersuisoqarsimasoq, taamaattumillu [anaanaasup] tapersersortitut ikiortitut atorfinitsinneqarsimasoq, sulilu tassani atorfeqartitaasoq.

Kommuni ilitsersuisussaataa nerminik eqqortitsisimasoq kommuni isumaqarnerasoq eqqarsaatigalugu [anaanaasooq] meeqqaminut tapersersortitut ikiortaasinnaaneq eqqarsaatigalugu sooq ilitsersorneqarsimannginnerasoq nassuiarsinnaanngilara. Tamanna suliami allanneqarsimanngilaq.

2. Atuarfimmi ilinniartitsisup 2. februar 2018-imi nalunaarutiginninnera eqqarsaatigalugu Qeqqata Kommunianalunaarutiginninneq pillugu qisuariarsimanersoq suliami ajoraluartumik allanneqarsimanngilaq.

3. Suliami allattuiffimmi allattukkat ilanngussatut nassiunneqarput.

[...] (Ombudsmandeqarfimmi nutsigaavoq)